



ԱՎԵՏԻՔ ԻՍԱՀԱՅԱՆ

15



Երբ ավելի քան 100 տարվա հեռավորությունից նայում ենք Ավ. Իսահակյանի գրական, հասարակական, քաղաքական գործունեությանը, տեսնում ենք Վարպետի ամբողջ վիթխարիությունը: Նրա ողջ գործունեությունը միտված է մեր այսօրվա խնդիրներին:

-Պահպանել ավանդականը, պահպանել ազգայինը, պահպանել հայկականը:

-Անողորմ լինել դրսի ու ներսի թշնամիների հանդեպ, որոնք ձեռք են բարձրացնում մեր ազգային, հայկական վրա: Իսկ որտե՞ղ ենք հայտնվել մենք հիմա... Ինչպե՞ս ենք կարողանում հանդուրժել, երբ չնչինները քար են նետում անգամ Արարատին...

Բայց «Արարատի ծեր կատարին / Դար է եկել, վայրկյանի պես, / Ու անցել»... սա էլ կանցնի:

Որքան էլ մեծ է Վարպետը, հասարակ է նաև և բոլորին հնարավորություն է տալիս երկխոսելու իր հետ. լինի փիլիսոփա թե՛ մաճկալ, մտավորական

թե՛ յայլավոր: Ես էլ առիթից օգտվելով փորձեմ երկխոսել մեծն հորեյարի հետ:

-Ողջո՛ւյն, սիրելի՛ Վարպետ, շնորհավորում եմ համահայկական տոն դարձած քո ծննդյան 150-ամյակը:

Շնորհավորում եմ նաև օտար ամառի ճամփեքի վրա դեգերող քո բազմա-հազար արտագաղթած զավակների անունին:

Համբերանքի չիբուխը ծխող քո վիատված զավակների անունին:

Ազատության զանգը կարծես կորցրած, բայց իրենց հոգու խորքում հավերժորեն պահող քո զավակների անունին:

Ողջ հայկական սփյուռքի՛ անունին, սփյուռք, որը գոյացավ, երբ մեր ժողովուրդը սխալվեց և կեղծ բարեկամությունը նախընտրեց իրական պայքարին:

Ի վերջո, բոլոր մահկանացուներիս ողջո՛ւյնն ընդունիր, անմահ Վարպետ: Ավ. Իսահակյանը, բացի հայ գրա-

կանության հենասյուն լինելուց, բացի հզոր հասարակական-քաղաքական գործիչ լինելուց, նաև մեր ազգի խորհրդանիշներից մեկն է: Նրա քաղաքական վաստակը նույնամուն է Հայաստանի զինանշանին, հասարակական գործունեության հոգևոր դրոշմ ծածանվում է ոչ միայն մեր փոքրիկ հողակտորի, այլև ի սփյուռս աշխարհի վրա, իսկ նրա գրական ժառանգությունը հայ ազգի օրհներգն է. վկա մեծ բանաստեղծի՝ ստեղծագործությունները, որոնք մեր ժողովրդի շուրթերին են հար ու լինելու են հավետ: Ուրեմն Վարպետը համահավաք Հայաստանն է և նրա անձնավորված խորհրդանիշը:

Իսկ եթե գանք գրականություն, եթե գանք նրա խոհափիլիսոփայական շերտերը...

«Ոգու սովի» կանխագուշակումից մինչև «աստիճանները վերևից լվալու» պատգամը, և այս երկուսի միջակայքում, և այս երկուսից առաջ և հետո էլ Իսահակյանը արդիական է,

Իսահակյանը մեզ հետ է և մեր կողքին: Իսահակյանի ստեղծագործությունները, Իսահակյանի գործն ընդհանրապես մեր մեջ է, իսկ ավելի ճիշտ՝ մեր հոգու շուրթերին: Մնում է մեր դեռևս ունեցած հոգին չկորցնենք, մեր արդեն կորցրած հոգին վերադարձնենք, և ամեն ինչ իր տեղը կընկնի. մենք դարձյալ կլինենք ոգեղեն, Իսահակյանը և մեր մյուս մեծերը կլինեն մեզ հետ և ապրվող կյանքը կլինի իմաստալից և ավելի մարդկային...

Ուրեմն երիցս փառք այն հողին, այն ջրին, որ Իսահակյան են ծնել:

Փառք քեզ, ամեն ինչ տեսած Գյումրի քաղաք:

Փառք քեզ, բազմաչարչար Հայաստան աշխարհ:

Փառք քեզ, «Իմ տառապած ու փառապանծ», իմ երիցս խաբված, բայց լավագույնին արժանի, հայ՝ ժողովուրդ:

Անդրանիկ
ԿԱՐԱՊԵՏՅԱՆ

ՀԱՅ ԳՐԱԿԱՆՈՒԹՅԱՆ ԱՎԵՏԻՍԸ

Պատմում են, որ 1875թ. հոկտեմբերի 30-ին, երբ աշխարհ եկավ Ավետիք Իսահակյանը, տատները բացականցել է՝ ավետիս՝ բարի լուր... Հարեւան սենյակում շնչասպառ այդ լուրին սպասող հայրը՝ Սահակը, վճռում է Ավետիք անունով կնքել իր որդուն:

Իսկապես, նա մեծ ու բարի լուր եղավ իր ժողովրդի ու հայ գրականության համար: Դեռ պատանի՝ պատանի չեղավ. իր ոգու անդունդին կռացած աշխարհին զուլում ասող եղավ:

Մեր զառ-վառ երազների բանաստեղծը, սիրուց երված բլբուլը, մեր դարդու և մուրազլու սրտի մխիթարը, մեր Ալազյազի պես դուռնան կապածը, մեր սրտով սիրած Վարպետը, որ պահում է մեզ Բանաստեղծության յոթ ճյուղ վերելում... Ես մեծ սիրահարն ու սիրուց երբեք չբեզարածը «երգեր ու վերքեր» հյուսեց, հույզերի տարերային թափով մորկեց իր երկրային սերերն ու երկնային հափշտակությունները, հասավ մի սահմանի, որից անդին անսահմանն էր...

«Ես երգիչ եմ, երկնի թիթեռ» հավատամքը խորացավ մեծ ժամանակի մեջ և շարունակեց հարստանալ կենսական նոր թրթռներով ու տիեզերական լիցքերով:

Իր ծննդյան 65-ամյա հորեյարին Ավետիք Իսահակյանի խոսքը հնչեց իբրեւ սրտառուչ ներքող հայրենի եզերքին. «Սիրելագույն Շիրակն ինձ համար տիեզերքի կենտրոնն է եղել, որովհետեւ այստեղ է, որ սկսել է բաբախել իմ սիրտը: Այստեղ եմ զգացել աշխարհը: Այս կենտրոնում է սկիզբ առել իմ աշխարհաճանաչումը: Այստեղ եմ լսել ու սովորել մեր հոյակապ մայրենի լեզուն...

...Նվիրական Շիրակում եմ հյուսել իմ շքեղ երազները, նրա զմրուխտն Մանթաշում, Ալազյազի աղանձնդե կատարի վրա, բյուրեղ աղբյուրների զրնգոցի մեջ, Արփաչայի ափերում, բուստաններում, ջաղացներում և Անիի ներշնչող պարիսպների ու առյուծաբաշ բուրգերի տակ: Ես չափազանց երախտապարտ եմ իմ հավերժ սիրելի Շիրակին, որովհետեւ նա ինձ կազմավորել, ոգևորել և դարձրել է հայ հինավուրց ժողովրդի անմահ ու վեհ գրականության անուններից մեկը, կրտսերագույնը: Այստեղ եմ ճաշակել հայ գրականությունը, որից ստացել եմ սրբազան պատգամներ...»:

Ընդամենը, Իսահակյանի բանաստեղծության առանցքը մարդու անսպառ հոգին է, հոգու վերսլացումը: Կենդանի հույզի, զգացումների ու կարոտի հրթիռներ է արձակում դեպի մեծ եզերք: Սրտի միջուկային երգեր են դրանք, և բառերն էլ նրան պետք էին իրենց խոսքի, Վեհ խոսքի համար...

Նա երգում է աստղի ու սրտի փառքի համար, տիեզերքի պերճ հյուսվածքի մեջ համար: Նրա երգը սրտակենտրոն է, նույնն է թե՛ տիեզերակենտրոն, ամեն ինչ պտտվում է սրտի շուրջը, սրտի մասին է, սրտի հետ է, սրտում է. «Սիրտս երկինք է, ամեն արարած աստղ ունի այնտեղ, գահ ունի այնտեղ»... «Սրտումս արեւ էլ չի ծագի, սիրտս էլ դուռնան, Ալազյա՛զ», «Ա՛խ, մերիկ ջան, մեկ նայե տես, սիրտս խորունկ վերք ունի», «Սրտիս սավդեն-խորունկ յարեն անդեղ թողեց ու գնաց...»:

Մարդու տիեզերացում և տիեզերքի մարդացում. սա է Իսահակյանի երգի ուղին, և ժողովուրդն էլ երգում է նրա երգերը, ինչպես իր երգերը կերպեր՝ ինքնամոռաց, թրթռում...

Մոլեգին Չարենցը այսպես պիտի գնահատեր մեծին.

Արդեն ցնորք է անհնար,
Ունենալ երգ՝ այնքան նախ,
Որ հմայե երեխային
Եվ ծերունու սրտում մնա:

Սրանով հանդերձ՝ Իսահակյանի բանաստեղծական գյուտն ու նվաճումն ոչ թե ժողովրդական երգին հավասարվելն է, այլ այդ երգի գլխին «աղանաղե թագ» դնելը, ժողովրդական տարերքը գեղարվեստական ընդհանրացմամբ հայ ժողովրդին վերադարձնելը: Մարդու կերպարի բացահայտման մեջ նա հասնում է բացառիկ նվաճման. հայտնաբերում է նրա տառապելու և երազելու ձևը՝ բնական տարերքից գնալով դեպի հոգու խորքը:

Աշխարհի միտքը իր մեջ կրող իմաստասեր բանաստեղծի գեղարվեստական տիրույթում հայ և օտար մշակույթների խաչաձևումից ծնվեց մի կատարելություն, որը պիտի ընդլայներ հայոց բանաստեղծության խոսքի ծիրը՝ լեզվի լեզուն...

Պատահական չէ, որ էպիկական մեծ ժամանակի մեջ մեծ տարերքի բանաստեղծին ընդունված է համարել հայ պոեզիայի Փոքր Միեր, ըմբոստ ու երազող, նաև վրիժառու ոգի, որ պատերազմ է հայտարարում չար ուժերի դեմ՝ ընդվզելով աններդաշնակ աշխարհի, սոցիալական անարդարության ու տիեզերական միջին դեմ...

Ռոզա
ՀՈՎՀԱՆՆԻՍՅԱՆ

Վարպետի՝ Ավետիք Իսահակյանի ծննդյան 150-ամյակի՝ հոբելյանական տարվա շրջանակներում ՀՀ Շիրակի մարզային բաժանմունքը վերջերս հյուրընկալել էր Գյումրու «Ընտանիք» բարեգործական հասարակական կազմակերպության մի խումբ աշխատակիցների ու սաների:

«Վարպետը վարպետների քաղաքում» խորագիրը իրենց՝ կենտրոնի ծրագրի անվանումն էր:

Օրվա բանախոսը բան. գիտ. թեկն. Կարինե Մարտիրոսյանն էր:

Ավետիք Իսահակյանին վիճակված էր ապրել հարուստ, բովանդակալից և ազգամվեր կյանք՝ լի բազում ստեղծագործական նվաճումներով, նաև՝ դժվարություններով ու դաճություններով: Նրա երգած սերը վարակիչ էր, ապրած կյանքն ու անցած ճանապարհը՝ եռանդամուր, թախծը՝ լուսավոր, տխրությունը՝ ցավեցնող:

Ավ. Իսահակյանը բազմաժանր գրող է և մեծաթիվ ժառանգություն է թողել այսօրվա և գալիք սերունդների համար՝ հավատարիմ մնալով իր պատգամին. «Մարդ

Ապա՝ հանդիպման երկրորդ մասում, զեկույցին հետևեցին ՀՀ Շիրակի մարզային բաժանմունքի նախագահ, բանաստեղծ Անդրանիկ Կարապետյանի և արցախցի բանաստեղծ Ռոբերտ Եսայանի ելույթները:

Բանախոսը անդրադարձավ Վարպետի «Ֆիզիկական» և հոգևոր ներկայությանը վարպետների քաղաք Գյումրիում սկսած գրողի ծննդավայր-օջախից՝ տուն-թանգարանից մինչև նրա հուշարձանը Թատերական

չափի մտածե աշխարհից բան տանելու մասին, այլ աշխարհում բան թողնելու մասին»:

Նրա երկերը թարգմանվել են տարբեր լեզուներով և արժանի տեղ ունեն համաշխարհային գրականության գանձարանում: Նրա ստեղծագործությունները հրատարակվել են տարբեր վայրերում՝ Պոլսում, Վենետիկում, Վիեննայում, Թիֆլիսում և այլուր: Հրատարակված գրքերը, նրա գրական ժառանգությունը պահպանվում են նաև գրադարաններում:

Գյումրու համայնքային կենտ-

րապարակում, ապա՝ դպրոցի, փողոցի առկայությանը՝ գրողի անվամբ: Վարպետի ստեղծագործական գործունեությանը անդրադարձը լայն կտավով էր՝ առանց ժանրային տարանջատումների: Մարդը, հերոսը, հույսի, հավատի ու ապրելու խորհրդանիշ հերոսը՝ Փոքր Միերի վերադարձով:

Անդրանիկ Կարապետյանը կարևորեց հատկապես մեր ժամանակների համար Վարպետի արարումների ոգին և ուժը՝ խոսքն ամփոփելով իր բանաստեղծութ-

րոնական գրադարանում իրենց ուրույն տեղն ունեն Ավ. Իսահակյանի ստեղծագործությունները, նաև՝ հուշագրություններ, գրականագիտական հոդվածների ժողովածուներ, նրա մասին մեծագրություններ, հուշագրություններ: Գրադարանում առկա է 1950 թվականին Հայաստանի պետական հրատարակչությունում հրատարակված երկերի ժողովածուն՝ երկու հատորով, երկերի լիակատար ժողովածուն՝ 14 հատորով, ծանոթ և անծանոթ էջեր, արձակ բանաստեղծություններ և պոեմ-

ներ՝ տարբեր տարիքի ընթերցողների համար:

2024 թվականին Ավ. Իսահակյանի տուն-թանգարանի նախաձեռնությամբ հրատարակվեց «Ավո, կնուտը գցեմ» գիրքը, որը նվիրված է գրողի ծննդյան 150-ամյակին: Գրքում ներառված են 42 հեղինակի տարբեր ժամանակներում մամուլում և գրքերում հրատարակված կատակով լի հուշեր ու մանրապատումներ, որոնք յուրովի են բացահայտում Ավ. Իսահակյանի մարդկային հատկանիշները՝ անկեղծությամբ

Ավարտին ՀՀ Շիրակի մարզային մասնաճյուղի նախագահ Անդրանիկ Կարապետյանը «Ընտանիք» կենտրոնի գրադարանին նվիրեց Կարապետ Գովսեփյանի «Ծաղիկներ ժամանակի ծյան վրա» ժողովածուն, իսկ ներկայացրին՝ կրկին նույն հեղինակի «Մարդն արարիչ» պոեմը՝ որպես վկայություն իսահակյանական օրը ամփոփող ոգեղենության:

Կարինե ՄԱՐՏԻՐՈՍՅԱՆ

ու նուրբ հումորը: Գրքում գետեղված հուշերում երևում է ժողովրդի մեծ սերը սիրելի բանաստեղծի նկատմամբ:

Կենտրոնական գրադարանում գիրքը կա և սիրով տրամադրվում է ընթերցողին: Մենք՝ գրադարանավարներս, մեծ պատասխանատվությամբ ենք կատարում մեր գործը՝ սերնդեսերունդ փոխանցելով այն հարուստ գրական ժառանգությունը, որ պահվում է գրադարանում:

ԱՆՆԱ ՍԵՐՈԲՅԱՆ

ԿԳՄՍ նախարարության աջակցությամբ Գյումրիում Ավետիք Իսահակյանի ծննդյան 150-ամյակի հոբելյանական միջոցառումների շրջանակում իրականացվել է «Երկեր և երգեր» նախագիծը:

Միջոցառումների շրջանակում Գյումրու Ավ. Իսահակյանի հուշատուն-թանգարանում ամփոփվել է վարպետի ծննդյան 150-ամյակին նվիրված հոբելյանական միջազգային գիտաժողովը՝ ներկայացվել են գիտական զեկույցներ, որտեղ Շիրակի մարզային գրադարանից զեկույցով հանդես է եկել

տնօրենի տեղակալ Նազմինե Բաղդասարյանը:

Վերջինս ներկայացրել է Իսահակյան-գրադարան կապի մասին տեղեկություններ, տեղեկացնելով, թե ինչպես է 1940թ. ՀՍՄՀ ժողովրդական կոմիսարների խորհրդի որոշմամբ քաղաքային գրադարանը անվանակոչվել բանաստեղծի անունով, այնուհետ 1978թ. Լենինականի քաղաքի գործկոմի ենթակայությամբ գործող գրադարանները միավորվել են, կազմավորվել է Գրադարանային կենտրոնացված համակարգը, Իսահակ-

յան բանաստեղծի անվանակիր գրադարանը դարձել համակարգի կենտրոնական գրադարան՝ ղեկավարելով քաղաքի բոլոր հանրային ու մանկական գրադարանների գործունեությունը:

1996թ. Հանրապետությունում մարզերի կազմավորումից հետո, Գրադարանների կենտրոնացված համակարգը մասնատվել է, համակարգի կենտրոնական գրադարանի հիման վրա ձևավորվել է «Շիրակի մարզի հանրապետական գրադարան»-ը՝ իր պաշտոնական անվանման մեջ չլրե-

լով Իսահակյանի անունը, անցել Հանրապետության մշակույթի նախարարության ենթակայության տակ, իսկ գրադարանային համակարգի աստիճանաբար վերականգնվող նախկին 24 մասնաճյուղերը՝ քաղաքային իշխանության ենթակայության:

«Գրադարանը պահպանում է տարիների իր ավանդույթը» պատշաճորեն արձագանքելու մեծ բանաստեղծի՝ թե ծննդյան տարեդարձին, թե մահվան տարեփոխներին, 1975 թվականից, Ավետիք Իսահակյանի ծննդյան

100-ամյակի առիթով սկիզբ առած պոեզիայի Իսահակյանական օրվան: Շիրակի մարզային գրադարանի հավաքածուն հարուստ է Իսահակյանի ստեղծագործությունների ու դրանց մասին գրականագիտական հրատարակություններով... Մեր և գալիք սերունդների խնդիրն է՝ զմայապահել ու պահպանել այդ հոգևոր հարստությունը», - ամփոփել է իր զեկույցը Ն. Բաղդասարյանը:

ԱՎԵՏԻՔ ԻՍԱՀԱԿՅԱՆ

ԵԻՂՅԱՐԸ

Թափառական Շիրհարը վեր բարձրացրեց մտազբաղ աչքերը, որոնց վրա արևակեզ ճակատի խորշոմներն էին իջել:

Եվ տեսավ զարմանքով, որ այն վաղեմի ծանոթ ծովը, որի շառաչուն ափերով ինքն անցել էր մի քանի անգամ իր դարավոր թափառումների անկայան ընթացքում, հիմա մի ծաղավուտ և տատակոտ անապատ է դարձել:

Եվ տեսավ, որ նախկին ծովի կանաչ ալիքների փոխարեն, որոնց վրա նավերն էին օրորվում փետուրի պես, հիմա ավազի դեղին ալիքներն են գալարվում անապատային առյուծի բաշերի պես:

Եվ նավերի փոխարեն դանդաղ քայլում է քարավանը խուլ դղղանջունով:

Երկաթեղեն ոտներով մոտեցավ նա քարավանի պետին և խաձայն հարցրեց.

- Քանի՞ ժամանակ է, որ այստեղ անապատ է գոյացել:

- Խեղճ ծերուկ, խելքդ թոքրել ես,- բարձրաձայն ծիծաղեց առաջնորդը:

- Ճիշտ եմ ասում, անծանոթ բարեկամս, տարիներ առաջ երբ անցա, այստեղ մի անգոր ծով կար, իսկ հիմա՝ անջուր անապատ է:

Եվ նրա ահազդեցիկ ձայնը գալիս էր դարերի մռայլ խորքերից:

- Սակայն քո աչքերից չի երևում, թե դու խելագար ես: Բայց ի՞նչ անհասկանալի բաներ ես ասում: Մեր պապերի պապերի պապերը անցել են այս տեղով, ու նրանցից էլ շատ առաջ շատերն են անցել, իսկ այս անապատն աշխարհի սկզբից կար ու կմնա...

Երազի մեջ ես, ծերուկ, երազի մեջ:

Մի դաժան ծաղր կծկվեց Շիրհարի սևաթույր շրթների անկյունում: Եվ նորից քայլեց առաջ:

Անցան դարեր, նորից դարեր: Թափառական Շիրհարի հարյուր անգամ երկիրը չափող ոտները մի անգամ վերստին ուղղվեցին դեպի անապատը:

Երբ մոտեցավ ծանոթ վայրի սահմաններին, տեսավ, որ երեկվա ամայի անապատում հիմա մի մարդաշատ քաղաք է եռում:

Մոտեցավ քաղաքի մեծ դռանը և միամտորեն հարցրեց դռնապանին.

- Ի՞նչ շուտ շինեցիք այս քաղաքը:

Դռնապանը շատ տարօրինակ գտավ այս հարցը:

- Ինչպե՞ս թե... շինեցիք: Վաղո՞ւց, վաղո՞ւց գոյություն ունի այս քաղաքը. մեր պապերի պապերի պապերը չգիտեն անգամ, թե ով և երբ ձգեց այս քաղաքի հիմերը: Այս քաղաքն այնքան հին է, որքան աշխարհը:

Մռայլներով լեցուն աչքերը մեծ թափառականը նետեց քաղաքի վրա՝ փողոցներում և շուկաներում խոնավում էին այրեր, կանայք և երեխաներ:

Ոմանք աճապարում էին մտա-հոգ, ոմանք արևի տակ զվարճանում էին անհոգ, և երեխաները զվարթ խաղ էին անում աղբյուրների շուրջը:

Կանայք՝ պղնձված վարդերով ու գոհարներով, հրապուրում էին հավերժական ճշմարտի և գեղեցիկի մասին, մարդու տիեզերական արժեքի և նրա գերագույն նպատակների մասին...

Նորից մի դաժան ծաղր գալարվեց՝ անապատի օձի պես՝ Շիրհարի մթազին շրթների վրա:

Այն թռչող վայրկյանը, որ մար-

դիկ կյանք են անվանում, հավերժական է թվում այս խեղճերին... Սակայն, ով փրկարար պատրանք... Իրենց խխունջից տիեզերական օվկիանի խորհուրդներն են լուծում և օրենքներ են սահմանում անհունի և անսահմանին... Անապատի վրայից սահող ամպի ստվերից ավելի մտախոգ է ձեր էությունը... Սակայն տեսնե՞ք վաղը ի՞նչ է լինելու...»:

Եվ վերստին քայլեց անդուլ դարերի թափառականը:

Անցան դարեր, նորից դարեր, և եկավ վաղը:

Հիշեց Շիրհարը վաղեմի քաղաքը և ուզեց այցելել նրան:

Երբ հասավ նրա սահմաններին, տեսավ, որ քաղաքի տեղը հիմա փռվում է մի դաշտավայր՝ ծաղկավետ և գարնանագեղ: Գետակի ափին պարում էին ու երգում նորաբողոք աղջիկները: Եվ հովիվը արածեցնում էր խաշների հոտը սրնգի դայլայների տակ:

- Ո՞ր գնաց այստեղից քաղաքը,- հարցրեց նա հովիվին:

- Ի՞նչ քաղաք,- ապաչեց հովիվը: - Տարիներ առաջ իսկ և իսկ այս կողմերն էի. մի մարդաշատ քաղաք էր եռում այստեղ: Նրա մասին է խոսքս...

Հովիվը քար կտրած նայում էր Շիրհարին:

- Ե՞րբ առաջ եկավ այս դաշտը,- հարցրեց Շիրհարը:

- Ի՞նչ սարսափելի բաներ ես ասում. ես քեզ չեմ հասկանում... Մեր պապերի պապերի պապերը, և էլի առաջ, այստեղ իրենց հոտերն են արածեցրել: Այս դաշտը կար աշխարհի սկզբից և կմնա...

Հիմնավորք թափառականի մռայլ շրթները նորից գալարվեցին, և արգահատանքի մի հայացք դաշտյանի պես շողաց նրա աչքերում:

«Եղելի մարդիկ, երեկը նրանց համար գոյություն չունի, այսօրն է նրանց համար միակ իրականը... Երգում են, պարում և չգիտեն, որ իրենց ոտների տակի երեկվա գերեզմանը վաղը իրենց գերեզմանն է լինելու...»:

Եվ նորից քայլեց Շիրհարը: Չյուրաբայր մագերը ալեկոծվում էին նրա մթին ճակատի վրա: Քայլում էր և հոգու խորքում դառնագին խորհում մարդու միամտության և նրա գոյության ակնթարթի վրա և բոլոր իրերի գահավերժ հոսման վրա...

ՊՍԻՄԵ

Երանի՝ նրան, ով պատրանք ունի, որովհետև նրա համար աշխարհը հայրենի հարկ է դառնում՝ քաղցր ու ջերմագին:

Երանի՝ նրան, ով կարող է գեղեցիկ ստով խաբվել, որովհետև իրական աշխարհը դառն է ու դաժան, և մարդկանց կամքը՝ չար ու անիրավ:

Եվ, վերջապես երանի՝ նրան, ով երազ ունի, որովհետև երազն է, որ սփռում է իր ծաղկաբույր պարտեները՝ օձուտ ու տատասկոտ անապատների վրա:

Մի գուսան է եղել՝ անտուն ու թափառական: Գյուղից գյուղ շրջում էր նա պատմելու համար հիմնավորք գրույցները բարի և ազնիվ գործերի մասին. Հյուսում էր խոնարհ խրճիթների մեջ իր տեխնիկները մի արդար ապագայի մասին, և վառում էր պատանիների սրտերը ճշմարտի սիրով, ու քարացածների քնած խիղճը վրդովում մի պահ:

Եվ այսպես վաստակում էր այն պատառ հացը, որ ստիպված է մարդ ունենալ ամեն օր:

Աշնան մի օր, երբ մի գյուղից մյուս գյուղն էր գնում նա, մշուշը

ծածկեց նեղ արահետը. մոլորվեց գուսանը մացառների մեջ, գիշերվա մութը վրա հասավ, և զայրագին փչեց հյուսիսի հողմը, որ անպարտելի ցրտով այրում էր անպատշապար գուսանի մարմինը:

Դեգերում էր նա մի խորշ, մի խռոչ գտնելու համար՝ պաշտպանվելու կատաղի հողմից. և հանկարծ հանդիպեց մի լքված հյուղակի, որի բաց դռնից տեսավ բուխարիկի մեջ երկու մեծ, բոցավառ կայծեր՝ երկու մեծ, բոցավառ ածուխի մեջ. շտապ ներս մտավ գուսանը, նստեց բուխարիկի մոտ և սառած ձեռները տարածեց ածուխի վրա. ջերմությունը ձեռքերից տարածվեց ողջ մարմնի մեջ. տաքացավ գուսանը, և ձեռքերը անընդհատ բռնած մշտական ածուխի վրա՝ գլուխը հենեց պատին և ննջեց երջանիկ մանուկների պես:

Երբ հողմը դադար առավ, պարզվեց երկինքը և ճշույնով լույսը շողաց լքված խրճիթում, գուսանը զարթոնեց և տեսավ, որ բուխարիկի մեջ կրակի փոխարեն մի կատու է ծվարել՝ ոսկեղեն աչքերը երկու ածուխի պես բոցավառ, որ, սակայն, դաժան գիշերին փրկեցին նրա կյանքը:

Երանի՝ նրան, ով պատրանք ունի, որովհետև նրա համար աշխարհը հայրենի հարկ է դառնում՝ քաղցր ու ջերմագին:

Երանի՝ նրան, ով կարող է գեղեցիկ ստով խաբվել, որովհետև իրական աշխարհը դառն է ու դաժան, և մարդկանց կամքը՝ չար ու անիրավ:

Եվ, վերջապես երանի՝ նրան, ով երազ ունի, որովհետև երազն է, որ սփռում է իր ծաղկաբույր պարտեները՝ օձուտ ու տատասկոտ անապատների վրա:

ՆԱՐԻՈՒՆ ԹՈՒԽԻԿՅԱՆ

««Ուստա Կարոն» վեպ-էպոպեա է. այն արտացոլում է պատկերվող դարաշրջանի իրադարձությունները, հանդես է բերում բարդ հարաբերությունների մեջ գտնվող մեծաքանակ կերպարներ»:

Իսահակյանը վեպն սկսել է գրել 1910թ. ապրիլի 21-ից և աշխատել է տեմդագին ոգևորությամբ: Վ.Աբովյանին և Գ.Լևոնյանին ուղղված մամակներից տեղեկանում ենք, որ Վարպետին չի գոհացրել ստեղծածը, և քսանական թվականների կեսերին մեծ լարումով աշխատել է այդ ուղղությամբ: «Ես դժգոհ եմ եղածից... Ես նորից եմ գրում այն, 1000 էջ նորից եմ գրելու: Բայց պետք է լինել Ուստա Կարոյի միջավայրում, տեսնել, ստուգել նորից տիպերն ու պատկերները, երկիրն ու օդը, բարբառները...»: Ակնհայտ է, որ Վարպետն իր «մտածումների», իր «տեսիլի» իրականացման հարցում կարևոր է համարում լեզուն, այդ թվում նաև բարբառները: Բարբառային բառերին ու ձևերին Իսահակյանը դիմում է միջավայրի ու կերպարների իրապաշտականությունն ապահովելու, բնական միջավայր և համապատասխան բնավորություններ կերտելու, համապատասխան լեզվական մթնոլորտ ստեղծելու նպատակով:

Իսահակյանի արվեստի կարևորագույն առանձնահատկություններից մեկը՝ ժողովրդայնությունը, ապահովված է նախ՝ ժողովրդական լեզվամտածողության խոր զգացողությամբ: Ժողովրդայնությանը նպաստել են դարձվածքները, համագործածական հասարակ բառերի փոխաբերացումները, բարբառային բառերի և ձևերի գործածությունները, առած-ասացվածքների և այլ միջոցների տեղին կիրառությունները: Այդ միջոցներից Իսահակյանը հատկապես օգտվել է ամենատարբեր խավերի պատկանող հերոսների կերպարներն իրենց բնորոշ բնավորության գծերով կերտելու, տիպականացնելու համար: Վեպի մասին խոսելիս ուսումնասիրողներն այն ինչ-որ իմաստով ինքնակենսագրական են համարում՝ նկատելով, որ Ուստա Կարոյի բերանով Վարպետն «արտահայտում է պատվի ու արդարության, սիրո և մարդասիրության սեփական ըմբռնումները, պարզում ու պարզաբանում ճաշակած ցավերն ու դառնությունները», այլև իմաստուն հայացք նետում ժողովրդի կենցաղի և հոգեբանության ծալքերին: Ուշագրավ է գրողի դիմումը բնության հավերժական երևույթներին, ինչպես հավասարը հավասարին: Աստղալից երկնքի տակ գրուցելիս Ուստան Զարուբին ասում է.

- Մարդ գոյա մի գեղեցիկ էրոնց մեկի տեղն ըլին, մեկ պստիկ աստղ ու վերենն աշխարհին նայե, ամեն գեղ ու քաղաք, երդիկներեն ու պատուհաններեն ներս, ինչեր կտեսնի, իմաստուն կդառնա: Նկատելի են ժողովրդական մտածողության լեզվամիջոցների հմուտ իրացումները բնական, կենդանի խոսք ստեղծելու համար: Ուստայի և Զարուբի գրույցը հիշեցնում է ժողովրդական ասք, բանահյուսական մանուշ, որի հեղինակը, դժվար է ասել, ժողովուրդն է, թե՞ նրա ուսյալ զավակը, որ իր աշխարհընկալումը ներկայացնում է շատ տեսանելի, բոլորի համար հասկանալի, ծանոթ առարկաների ու միջավայրի երևույթների բանաստեղծականացմամբ: Զերոսների, տվյալ դեպքում՝ հեղինակ-հերոսի

և Զարուբի հոգեվիճակին համահունչ են բառագործածությունները. «Բայաթու պես անուշ գիշեր էր...»:

Համեմատության եզրը՝ բայաթին, արդեն բաց է անում աշխարհների ու ժողովուրդների մշակույթին ու կենցաղին, մարդ-

ԱՎԵՏԻՔ ԻՍԱՀԱԿՅԱՆԻ «ՈՒՍՏԱ ԿԱՐՈ» ՎԵՊԻ ԼԵՉՎԻ ԱՌԱՆՁՆԱՀԱՏՎՈՒԹՅՈՒՆՆԵՐԸ

կային հոգիներին քաջատեղյակ Ուստայի ներաշխարհը. նաև Արևելքն ենք զգում: Զրույցի միջոցով աստիճանաբար բացվում են մարդկային կյանքի բոլոր շերտերը՝ համապատասխան լեզվատարրերի շնորհալի գործածություններով, որոնք տարբեր են և նույնաբժեք: Վեպի գլուխներից մեկում գյուղացիները Ուստա Կարոյի մասին ասում են. «Ուստան մամը չունեցող խոսքաշեն մարդ է», ապա՝ «Ուստան շատ տեղեր թափառելով, բնականաբար, իր լեզվի մեջ թափանցել էին զանազան զավառներից որոշ տարրեր, ձևեր ու ոճեր, որով նրա խոսած լեզուն տարբեր բարբառներից մի տեսակ խառնուրդ էր դարձել»:

Իսահակյանը ոչ միայն գործադրում է մայրենի լեզուն, այլև հարստացնում է նրա զանազան, մյուս կողմից՝ օգտվելով մայրենի բարբառի (և ընդհանրապես բարբառների) բառերից՝ դրանք ծառայեցնում է կերպավորման արվեստին, կերպարների խոսքի տիպականացմանը: Բերենք մի քանի բնորոշ օրինակ. «աստված» բառը տարբեր հերոսների շուրթերին հնչում է այսպես՝ Ուստային ուղեկցող և փոքր-ինչ «բարեկրթված» Փիլոս. «Աստված ամեն մարդու սրտով իրան կուտա», «Ասպած է դրկե էդոնց մեր հայի ոխն առնելու համար»՝ գյուղացիներից մեկը, այլ բարբառակիր՝ աստուծ, հոգևորականների շուրթերին տյառն, արարիչ և այլն, կամ՝ երկար-երկայն-երկան-երկեն տարբերակները գործածված օրինակներում անպայման ընդգծված ոճական արժեք ունեն. գրուցակիցներից մեկը մարդուն է «երկար կյանք», մյուսը՝ «երկեն արև», Ուստան՝ «երկան», մինչդեռ հրաշք աղչկա մազերը «ջրի պես երկայն էին»:

Բարբառային-խոսակցական բառաշերտին պատկանող շատ բառեր, որոնք մեծ արվեստով գործածել է Վարպետը, այսօր արդեն գրեթե գործածական չեն և ներկայացնում են բարբառի վեպի ընդգրկման ժամանակաշրջանի պատկերը: Այդպիսիք են *իշխնալ*, *նամարդ*, *կնիկարմատ*, *տեղոցտեղ*, *մերեններ*, *հնճարել*, *մեղորտեղ*, *չենլիք*, *մեղոնել* բառերը:

Գիշտ է դիտարկումը, թե կերպարի տիպականացումը, լեզվական անհատականացումը բավական դժվար հմար է և գրողից պահանջում է լեզուն զգալու, տիպականը, բնորոշը գտնելու, մարդկանց մտածելակերպին ու հոգեբանությանը համահունչ դարձնելու կարողություն, գրական վարպետություն, կենսավործ:

Այդ նշված բնորոշ տարրերից է օտար բառերի քաջահմուտ գործածությունը վեպի լեզվում, որով Վարպետը ոճավորել է հերոսներից յուրաքանչյուրի խոսքը՝ ըստ սոցիալական պատկանելության, ըստ անհատական լեզվամտածողության, նաև ըստ լեզվի զարգացման տվյալ ժամանա-

կաշրջանի վիճակի:


Այսպես՝ գեղջկուհու խոսքում «ղայֆա» բառը բնական է հնչում և պարզապես փոխարինելի չէ. «Քեռեկինս մե շալ ուներ... գունը ղայֆայի, վրան կաս-կապուտ մի-շաններ...»: Հաջորդ օրինակում արդեն նկարագրվող միջավայրի

յուրավոր ու հարյուրավոր դարձվածքներ կարելի է վկայակոչել՝ ամենատարբեր հարիմաստներով՝ ականջս բերանդ է, ականջ չկախեց, քարվանդի գլուխը ել, խոսքիս կատարն առ, «Թևա

բռնողն ո՞վ է, ծովեր կրակեն», կամ մեկ-երկու տողում տարողունակ դարձվածքները ծառայում են կերպավորմանը (հարսը) «ջրի է», ողորմած «փեշը բացել է», եկողին «ծարավ հետ չի դարձնե» և այլն: Բազմաթիվ են անիծական և բարենաղթական դարձվածքները, հուզական, հորդորական խոսք-դարձվածքները, որոնցով Իսահակյանը ոչ միայն ապահովել է ժողովրդի շունչն ու ոգու արտահայտությունը, այլև ստեղծել է կյանքի իրական պատկերներ և կենդանի բնավորություններ՝ աղքատի օրոցքը կոտրի, բերանս ծոռվի, ճգնն դուրս գալ, վարդապետի լեզու թափել, դավուլի երկու երեսը զարկել, չեն մնա օջախը, մեկ նալին տալ, մեկ մեխին, սրտի ակամք, երկինք ու գետին իրար խառնել, խելքը ջրի հետ երթալ. «Ես քեզի չի՞ ասի՞ խելքը ջրի հետ կերթա», նաև սրտի մեջ շուն ոռնալ, գետնին գերի լինել, միտքը փսոթել, (Ուստայի) կողմը տաշել, տնակուլի կնիկ և այլն:

Դեռ մեկ դար առաջ հայ աշխատավորը գործածում էր պապերից մնացած լեզվական միջոցները, ինչպես՝ «Էդ տեսակ սուտը մեր գյուղացոց բովն է, որ կեղծ վկայություն կենեն, սուտ երդում կուտեն»: «.... օրթե պուկ գայի, հեռուն կանգնեի, էնոնց մարդկանց ժիժի գայի»: «Սակայն ինքն իր փոքրիկ թափառումների մեջ ուսել էր բավական երգ ու զրույց»: «Օրինակ է Ուստայի ձեռքը, շինածը քանդում չունի»: «Մեր գեղի տանուտերը էդ գտնունքի մասին քաղաք գրեց»: «Մալխազ աղան մեծ կոչունք է տալիս»: «Կանգնեց սպասին» և այլն:

Մայր ժողովրդի կյանքն ու առօրյան, ձգտումներն ու երազանքները գրականության վերածած մեծ գրողը նրա խոսք ու զրույցի բնական, հարազատ մթնոլորտն ապահովելու բազմաթիվ միջոցների շարքում, իհարկե, գործածել է նաև բարբառին (և բարբառներին) հատուկ քերականական ձևեր՝ մեծացնելով խոսքի ժողովրդայնությունը: Դրանք հիմնականում սեռական և բացառական հոլովների բարբառային կազմություններ են, այլև բարբառային հրամայականի, համադրական կազմությամբ սահմանական ներկայի հաճախորդ գործածություններ, նաև այլ քերականական իրավություններ. «... Չես կրնա իմանա, էշերն են իրանց տիրոջներն սորվեր էդ կամապաշտ բնույթը, թե տերերն են իշերեն սորվեր... էդոնք որ կողքի ըկնին, օխքը լուծ գոմեշ լծես, իրանց տեղերեն չես կրնա ժաժել» կամ՝ «... Ամառվան կեսօրին արևը սուտ կիանեն, էն գլխեն պտի իմանաս, որ սարերու ձունը սև դուրս պտի գա»: Այդպես էլ ահու, վախու, Կավկավու (օձեր), Զաբաշու, ամորու և այլն, հոգնակի կազմության և դիման բարբառային-խոսակցական ձևեր, ինչպես՝ եզրներ, ախարտիք, գեղացիք-գեղացոց, նաև Տոնո



ամի, Ներսես քեհա, Փիլոս ախպար, սանհեր Մացակ և այլն:

Ժողովրդի լեզվամտածությունը, նրա կենսափիլիսոփայությունը, սոցիալական-կենցաղային հարաբերությունները, գիտակցական, մտավոր կարողությունները, բարոյական ըմբռնումները, հրաշալիորեն խտացված են առանձնություն, ասացվածքներում, սեղմ, դիպուկ խոսքերում: Վերջիններս զարմանալի վարպետությամբ գործածել է Իսահակյանը հերոսների խոսքում՝ յուրաքանչյուրին հատուկ կամ խոսքի նյութին բնորոշ կիրառություններով տիպականացնելով կերպարներ, արտահայտելով իրեն հետաքրքրող տրամադրությունը: Բերենք օրինակ՝ «... Բախտն է աշխարհիս կառավարողը. էսօր իշխան ես, վաղը՝ հող ու մոխիր, երեկ անունդ չգիտեին, էսօր մատով ցույց կուտան քեզի, էսօր դուռդ հազար մարդ հաց կուտե, էգուց դու հացի կարոտ ես»: Կյանքի պարզ ու ճշմարտացի բանաձևումն է, իմաստուն խոսքի, ժողովրդի հակիրճ մտածողության օրինակ, որը դարավոր կենսափորձից է ծնվել:


Հակիրճ է Աբրո ամին բնութագրում ծերանալու դառնությունը. «...ա՛խ, ծերություն, չար գերություն... Կյանքն որ երկմնա, համն կանցնի»...: Ներգործուն է առածը, որն ուժգանում է հակադրույթի գործածությամբ՝ «Ցավերս՝ երկար, խնդումներս՝ կարճ...»: Կամ ծերունիների զրույցից ազդված Ուստան մտաբերում է քրդերի խոսքը. «Մեռնել էդներ, ա՛խ ծերություն չեղներ»: Չափական ու նույնահունչ բառերով կազմված խոսքերի գործածությամբ Իսահակյանը կենդանի թրթռ, ռիթմ է հաղորդել խոսքին, մեծացրել նրա ուժը, բնականությունը: Նույն նպատակով գործածել է նաև ժողովրդի մարդկանց բառախաղերը. Ուստան «յապոններու, էդ հոպպոններու» մասին ասում է. «...Էդոնք թիզ ու կես - գետնի բզեզ» կամ՝ ծխախոտ հյուրասիրելով՝ «Քաշե՛ք, քե՛ֆերու՛ղ աշե՛ք» և այլն:

Վարպետն իրավացի է, թե «Մերը մարդու պզտիկ աստված կդարձնե», ուստի ինքն էլ այդ սիրով լեզու և գրականություն է արարում հավասարապես, միշտ այդ սիրով է ձեռքը վերցրել գրիչը և իրավունք տվել մեր մեծ գրագետներից մեկին՝ Ն.Աղբալյանին, ասելու. «Մեր լեզուն մի գեցք է հեղինակի ձեռքին, որ նա կարողացնում է վարժ ու թեթև գործածել, բայց ամենագլխավորն այն է, որ Իսահակյանը թափանցել է մեր լեզվի ոգու ներսը, այն աստիճան հայերեն է գրում, որ մեր կիսահայ լեզվին սովոր ականջին երբեմն խորթ են հնչում նրա դարձվածքներն ու արտահայտությունները»:

Մարիետա
ԽԱՉԱՏՐՅԱՆ
Բան.գիտ. թեկնածու, դոցենտ

ՀԱՍՄԻԿ-70

ՀԳՄ Շիրակի մարզային բաժանմունքում տեղի ունեցավ բանաստեղծուհի, նկարչուհի Հասմիկի «Ճախրող գույներ» մանկական բանաստեղծությունների գրքի շնորհանդեսը: 2025 թվականը հորեյվանական է Հասմիկի համար. լրացավ բանաստեղծուհու 70 ամյակը: Գրական տոնին բացի գրողներից ներկա էին Շիրակի մարզային և Գյումրու քաղաքային գրադարանների աշխատակիցներ, քաղաքի մտավորականներ: ՀԳՄ Շիրակի մարզային մասնաճյուղի նախագահ, բանաստեղծ Անդրանիկ Կարապետյանը ողջունեց ներկաներին, այնուհետև խոսեց բանաստեղծուհի Հասմիկի անցած գրական ճանապարհի մասին, հանձնեց ՀԳՄ Շիրակի մարզային բաժանմունքի վկայագիր՝ գրական վաստակի համար, մադթեց, որ պոետի գրչից մինչև ընթերցողի հոգին ընկած ճանապարհը գիրքը փառահեղորեն անցնի: Այնուհետև ելույթ ունեցան բանաստեղծ, «Շիրակ» ամսագրի գլխավոր խմբագիր Սամվել Մարգարյանը, բանաստեղծներ Սոնա Անտոնյանը, Ռոբերտ Եսայանը, Ռոզա Հովհաննիսյանը, արձակագիր Շնորհիկ Շահինյանը, «Դպիր» հրատարակչության հիմնադիր տնօրեն Հովիկ Կարապետյանը և այլք: Գրական միջոցառումը գրականագիտական ակնարկով եզրափակեց բան.գիտ.թեկնածու, դոցենտ Կարինե Մարտիրոսյանը: Բանաստեղծուհու շնորհակալանքի խոսքը հուզառատ էր, նա պատասխանեց ներկաների հարցերին, ընթերցվեցին բանաստեղծություններ «Ճախրող գույներ» ժողովածուից:



ՃԱԽՐՈՂ ԳՈՒՅՆԵՐ

«Ճախրող գույներ» ժողովածուն Հասմիկ Մաթևոսյան-Կարապետյանի՝ մանուկներին հասցեագրված գրքերից է:

Մանկան համար նրան սիրելի գույների խաղը որպես մեթոդ-միջոց գործածելով՝ հեղինակը ծանոթացնում է նրան աշխարհին, բացում բնության գաղտնիքները՝ տարվա եղանակների, օրվա ժամերի, տիեզերական մարմինների, կենդանական ու բուսական աշխարհի միջոցով: Ապա մարդկային ներքին ու արտաքին հատկանիշների մասին է խոսում, որին հաջորդում են այսօր արդեն անփոխարինելի դարձած նորագույն տեխնոլոգիաները, առանց որոնց նույնիսկ մանկան աշխարհը լիարժեք պատկերացնել չի կարելի:

Գործածվում են գեղարվեստական պատկերավորման միջոցներ, առավելապես անձնավորումը: Այդպես՝ կենդանական աշխարհի ներկայացուցիչներին բնորոշ հատկանիշներ՝ նրանց սննդի, արտաքինի, բնույթի նկարագրությունը, միջատների՝ զատիկի, թիթեռի, մեղուների աշխարհը և այլն:

Ընդհանուր առմամբ, մի կողմից՝ ծանոթացնում կենդանական աշխարհին՝ մերթ բնության մեջ՝ իրենց բնական միջավայրում, մերթ ակվարիումում կամ արգելոցում՝ կրկին վայրիճ հատուկ պայմաններում: Մյուս կողմից էլ՝ նույն կենդանիների բերանով մարդկային բարոյական հատկանիշների ներկայացումն է. «Նեղն ընկածին պիտի օգնեն: // Որքան էլ որ դժվար լինի, // Մեկը մյուսին պիտի օգնի»:

Ընկերություն մարդ-մարդ փոխհարաբերություններ, որը պետք է կարևորել՝ սկսած հենց մանկական տարիքից, ապա նաև, ինչ խոսք, կրկին կարևոր՝ մարդու և կենդանիների բարեկամությունը, որի միջոցով էլ, ամշուշտ, հեղինակը սահուն ապահովում է կապը մանուկների սիրելի հայ գրողի՝ Հովհաննես Թումանյանի հետ. երեխան անգամ չի էլ զգում, որ գիտելիք է ակամա ծեռք բերում նաև «Շունն ու կատուն» բալլադի մասին՝ ընդ որում՝ այուժետային գծերով և հասկանալի լեզվով:

Մանկան մաքրության և միամտության հենքին՝ հեղինակը բնության նկատմամբ սերն է սերմանում. ահա պապիկը, որ արևածաղկի սերն էր ցանել, և ահա թռչնիկը, որ կոնֆետի «սերն» էր տնկել՝ սիրելի քաղցրավենիքի ծառ ունենալու ակնկալիքով:

Գրողը խոսում է նաև նյութի, հատկապես ջրի տարբեր ֆիզիկական վիճակների մասին. միջոց, որով կրկին մանկան աշխարհագրագիտությունն է ձևավորվում:

Գրքում մի քանի բանաստեղծություններ միտված են երեխային հայրենիքի, հայրենասիրության գաղափար տալու, ապա, մեծ հաշվով, սերմանելու սեր հարազատ Հայաստան աշխարհի նկատմամբ, նվիրում ի բարություն հզոր հայրենիքի: Թեմայի շրջանակներում նաև հայոց գրերն են՝ առաջին ուսուցչից՝ Մեսրոպ Մաշտոցից մինչև դպրոցում առաջին ուսուցչուհի՝ ամբողջ այդ ուղին գծելով՝ կարևորելով հայոց գրերի խորհուրդը:

«Ոսկեվառ գիրը
Ուժը մեր բազկի,
Գոյության ուժը
Մեր հայոց ազգի»:

Մանկական բալային խաղերի մասին տեղեկություններ՝ ձնագնդի, պահմտոցի, ապա նաև՝ արիեստների և մասնագիտությունների մասին է խոսում հեղինակը՝ քանդակագործ փայտփորիկ, ապա՝ շինարար Գագիկ և այլն:

Ինչպե՞ս է հասնում մանկան ակին հացն համապագայա. հասկից մինչև հաց ուղին կրկին, հաշվի առնելով ընթերցողի տարիքային առանձնահատկությունները, պարզ և դյուրըմբռնելի:

Բնության հողի հետ կապի ներկայացումը նույնպես մանկան աշխարհայացքի ձևավորմանն ու զարգացմանն են միտված: Ապա՝ Տիեզերք՝ արևի ու լուսնի մասին, ամպերի ու ծիածանի մասին, ընդհանրապես՝ նաև մթնոլորտային երևույթների մասին:

Մեծ հաշվով, ժողովածուն արժեքավոր է՝ նախատեսված լինելով որոշակի խմբի համար և նրանց իսկ տարիքային առանձնահատկություններով պայմանավորված: Ուշագրավ է, որ գրքի նկարագրողությունները նույնպես

հեղինակային են, ուստի և նա՝ հեղինակը, ասելիքը նաև ամբողջացնում է այս միջոցով:

ԿԱՐԻՆԵ ՄԱՐՏԻՐՈՍՅԱՆ
Բան. գիտ. թեկն., դոցենտ



ՃԱԽՐՈՂ ԳՈՒՅՆԵՐ

Ինչ լա՛վն ես ամառ,
Գույներ ունես վառ:
Խայտում ենք կայտառ
Գետակում վարար:

Շոգից զովանում,
Չկներ ենք որսում:
Ճախրող գույներ են
Մեր շուրջը բազում:

Գույն-գույն ծաղիկներ,
Թիթեռներ նախշում:
Քեզ ենք մենք սիրում,
Ամա՛ռ մեր սիրում:

ԱՐԵՎԻԿԻՍ

Երկու արեւ ունեն ես,
Մեկը՝ կապույտ երկնքում
Շողշողում է, ջերմացնում,
Իսկ մյուսն էլ՝ իմ գրկում
Շուրջում է, դայլայլում:

Ես ուզում եմ, որ հավետ
Իմ երկնքում ծիծաղեն
Երկու արեւ ոսկեթել,
Մեկը՝ անամպ երկնքում,
Իսկ մյուսն էլ՝ իմ գրկում:

ՓՇԵ ՔԵՂԱԿ

Հայրս եկավ, մտավ բակ,
Բերեց պարկով մի գնդակ:
Պարկը իսկույն բացեցի,
Գնդակ խաղալ ուզեցի,
Բայց փշոտ էր գնդակը:
Չեռքս նրան պարզեցի,
Թաթիկներս ծակեցի:
Հայրս ասաց՝
- Դա գնդակ չէ, իմ բալիկ,
Այլ ոգնի է մի փոքրիկ:
Վախից է նա կծկվել,
Գնդակի է վերածվել:

ԽԱՏՈՒՏԻԿԸ

Թփերի մեջ բարակ մեջքը
Օրորում է խատուտիկը:
Ամպի նման թեթև,
Փափուկ իր գլխարկով,
Շորորում է խատուտիկը,
Բայց տե՛ս, նրան չպոկե՛ս,
Թե չէ խեղճին
Առանց գլխարկ կորոցես:

ԿՈՆՖԵՏԻ ՇԱՌ

Պապը ցանեց հողի մեջ
Արեւածաղիկ սերմեր,
Որ սերմերը մեծանան,
Արեւածաղիկ դառնան:
Դեղին, ոսկե արեւներ՝
Ծոցերում սեւ հատիկներ:

Փոքրիկ թռչնիկը օգնեց,
Դուլով սերմերը ջրեց:
Հետո գրպանից հանեց,
Կոնֆետը հողում թաղեց,
Որ կոնֆետը մեծանա,
Կոնֆետների ծառ դառնա:

ԹՈՒԹԱԿԸ

Հագի շորն է
Նախշո՛ւն, սիրո՛ւն,
Գլխի գլխարկն է
Վառվռուն:
Մարդու նման
Խոսել գիտի,
Ինչ որ ասես,
Կկրկնի:
- Ա՛յ՝ քեզ թռչուն զարմանալի:

ՀԱՍՄԻԿ

ԵՐԱԳԻ ԺԱՄԱՆԱԿ

Ավստրալիայի բնիկների տասնյակ հազարավոր տարիներ ձգվող, հնագույն պատմության և քաղաքակրթության առաջնքը «Երագի դարաշրջան» կամ «Երագի ժամանակ» կոչված հասկացությունն է: Մասնագիտական գրականության մեջ այն առավել հայտնի է անգլերեն «Dream Time» անվանումով, որը, ավա՛ղ, բնիկների լեզուներից ընդհանրացված, թերի թարգմանության արդյունք է: Ըստ էության, «Dream Time»-ն ունի տարրողունակ և բազմանշանակ իմաստ, որը գրեթե անհնար է լիովին արտահայտել այլ լեզուներում: Բնագրային մի քանի օրինակ նշյալ արտահայտության համար՝ Ngarre, Nggarri, Tjukuaia, Jukurrpa և այլն, թեև ունենք այն, ինչ ունենք: Մնում է ավելացնել, որ մշակութային այլ արժեքներով սնված, այսպես կոչված, արդի մարդկանց մեծամասնության համար «Երագի ժամանակի» աշխարհընկալումը մնում է խորթ ու դժվարամարս:

«Երագի ժամանակը» Ավստրալիայի բնիկների պատկերաց-

մամբ այն սրբազան առասպելական ժամանակահատվածն է, երբ նախնիների հոգիներն ու տիեզերական էությունները արարել են աշխարհը, մարդկանց, բնությունը՝ որպես մի անբաժանելի ամբողջություն: Բնիկների համար կյանքի ընթացքը ուղղափոխ չէ, այլ շրջապտույտ, որտեղ ամեն ինչ փոխկապակցված է ու վերադառնում է իր սկզբնական վիճակներին: Նրանց համար երկիրը, հողը, ջրերը ոչ մեկի սեփականությունը չեն, և բոլոր կենդանի արարածները Մեծ ընդունիքի անդամներ են: Նրանց պատկերացումներում նախնիները չեն մնացել անցյալում: Նրանք ապրում են նաև ներկայում, և կապը նրանց հետ իրագործվում է ծեսերի միջոցով, որոնք հիմնականում անցկացվում են սրբազան վայրերում: Եվ վերջապես մարդկանց գլխավոր պարտականությունն է պահպանել կյանքի ներդաշնակությունը և փոխանցել Գիտելիքը:

«Երագի ժամանակ» ամենևին էլ չի նշանակում քնել և երագ տեսնել. այն արտացոլում է հատուկ հոգևոր վիճակ, որտեղ չկա տարբերություն անցյալի, ներկա-

յի ու ապագայի միջև: Թեև բնիկները հավատում են, որ քնած ժամանակ մարդը կարող է չփվել ոգիների հետ, գիտելիք ստանալ և տեսնել նախնիների հետքերը:

«Երագի ժամանակը» պատմական ժամանակահատված չէ, այլ արտաժամանակյա տարածք՝ միշտ գոյություն ունեցող: Նրա մեջ ապրում են արարչական հոգիները, և այն ամենուր է: Այն հոգևոր իրականություն է, որտեղ արարվել է աշխարհակարգը:

Ավստրալիայի բնիկների մշակույթում «Երագի ժամանակը» խորապես արտահայտված է արվեստի՝ երգ ու պարի, նկարչության և ծեսերի մեջ՝ ծառայելով նաև որպես միջոց գիտելիքն ու կենսափորձը փոխանցելու համար:

Վերջին տարիներին Ավստրալիայի բնիկների արվեստը, հատկապես գեղանկարչությունը, դարձել է համընդհանուր հետաքրքրության և հիացմունքի առարկա՝ ցուցադրվելով աշխարհի հեղինակավոր թանգարաններում ու ցուցասրահներում՝ պատվավոր տեղ գրավելով լուրջ հավաքածուներում:

Ավա՛ղ, զգացնել է տալիս մա-

կերեսային ընկալմամբ մոդայիկ դառնալու վտանգը:

Հատկապես մեծ է հետաքրքրությունը կետային գեղանկարչության նկատմամբ, որը, ըստ էության, գեղարվեստական ծածկագիր է: Նկարների բարդ հորինվածքները, գունաբծերը պատկերում են «Նախնիների արահետները», որոնք կոչվում են “Songlines”՝ «Երգագծեր»:

Այդ պատկերները կարծես լիքն են ցեղախմբերի հոգևոր քարտեզներն ու ուղեցուցիչները: Հիշյալ պատկերների իրական իմաստը խորապես առնչվում է «Երագի ժամանակի» ծածկագրված գիտելիքի ու նշանների հետ, որտեղ վերացարկումը պահպանում է նվիրական գիտելիքը:

Բնիկների ծեսերը և երգն ու պարը ևս հիմնական պատումներ են արարչագործության մասին և փոխանցում են կյանքի օրենքների իմացությունն ու բացատրում բնության օրինաչափությունների բնույթը: Երգերը հիմնականում երգվում են ծեսերի ժամանակ, որպեսզի ոգիները չչեն շրջապատին և օժանդակեն երկրի էներգիայի հարատևմանը:

Պարերը, որոնք առնչվում

են «Երագի ժամանակի» հետ, հոգևոր գործողություններ են. պարողները մարմինները գունազարդում են և կատարում են այնպիսի շարժումներ, որոնք կրկնօրինակում են կենդանիներին ու ոգիներին:

Բնության յուրաքանչյուր բաղադրիչ՝ լեռ, աղբյուր, ժայռ, բուսականություն, կարող է կապված լինել «Երագի ժամանակի» պատմության հետ: Բնիկները Սրբազան վայրեր են այցելում նվիրական ծեսերն անցկացնելու համար, որոնք էլ ապահովում են կապը նախնիների հետ...

Ուրախալի է այն փաստը, որ Ավստրալիայի բնիկների արվեստը տարբեր դրսևորումներով ավելի ու ավելի է բացվում աշխարհին: Չնայած հնագույն մշակույթ լինելուն՝ այն առավել քան արդիական է, ուսանելի ողջ մարդկության համար, հատկապես մայր բնության հետ ներդաշնորեն ապրելու և հարաբերվելու հարուստ փորձով:

ՎԱՋՕ
/Վազգեն-Պաշկովի
Թարևոյան/

ՏԵՍԻՆԸ

Աշունն անտառափեշին էր հասնում, տերևներն իրենց դեղնապատույտ օրորն էին սկսում այնտեղ, երբ Արամն անտառ էր մտնում: Ցայգը դեռ երկինքների ճանապարհին, նա մշուշների միջով, սայլն առաջն արած, ճանապարհ էր ընկնում: Թուխս ու մեզ ծածկում էին նրան անկոչ հետաքրքասերի աչքից, որը կարող էր հանկարծ ճանապարհին հանդիպել կամ առավոտ կանուխ՝ պետքարան վազելիս, նկատել: Գյուղում ինչ-որ մեկը խաբարը՝ զիկի համբավ ուներ ու անտառ մտնողին ծախում էր գյուղապետի մոտ: Լավ էր, որ գյուղապետով էին պրծնում, եթե նրա դիտողությունից հետո էլի նկատվեին, այս անգամ արդեն անտառտնտեսությանն ու միլիցիային պիտի պատասխան տային:

Արամը չէր քնել ողջ գիշեր: Գիշերաշրջիկի նման թափառել էր սենյակից սենյակ, բակից տուն, տնից բակ: Սիրտը խռովահույզ էր, տագնապներով լեցուն: Կինն արդեն քանի օր էր՝ գամված էր անկողնուն, գրպանում կոպեկ չկար, տանը պաղոթյուն էր զգացվում, հիվանդ կինը դողդողալով վազում էր պետքարան, որդին սառած ձեռքերով էր դաս անում: Ուտելիքը՝ ոչինչ, էլի մի բան ճարվում էր, այժմ էլ լառելիքի ու դեղի հարցն էր, որ մտատանջում էր նրան: Սովին մի կերպ կդիմանան, ցավին ու ցրտին ինչպե՞ս դիմանան: Այս տարի ընկերներն իրեն չկանչեցին, աշխատանք չկար, իրենք էլ են պարապ, գրանցման համար էլ անընդհատ նեղում են: Գոնե մի քանի ամիս գնար, երկու կոպեկ աշխատեր, էլի մի բան առաջ կընկներ: Կնոջ համար էլ մտածել էր՝ գոքանչին կկանչի, կնայի: Բայց չէ, գործ չեղավ այս տարի, իսկ կինն օրեցօր ավելի էր վատանում, քաղաք պիտի տաներ, արդեն իսկապես առանց բժշկի չէր լինի:

Արահետները, որտեղ արդեն չորացել էին թուփ ու ծաղիկ, մաշվել էին համագյուղացիների սայլերից. գյուղապետը մեկ-մեկ չնկատելու էր տալիս. ի՞նչ աներ, մարդիկ կարիքի մեջ էին: Քամին այնքան արագ էր պտտվում, որ մերթնդումբ փորձում էր տանել գլխարկը: Մի ձեռքին՝ ճիպոտ, որով մեկ-մեկ ավանակին էր ծանապարհ ցույց տալիս, մյուսով փորձում էր գլխարկը գլխին պահել: Տագնապախառն մտքերից հոտելով՝ չնկատեց էլ, երբ անտառ հասավ: Գոտկատեղից հանեց կացինն ու անցավ գործի: Առաջին ծառը, որ երկար ճյուղեր ուներ, շատ ժամանակ խլեց, արդեն հոգնել էր և ուզում էր դադար առնել, երբ կկիկ ծայրի նման մի ծայն առավ ականջը: Լսողությունը լարեց: Քիչ անց ծայրը կրկնվեց՝ չէ՛, կկու չէր, աղջկա կչկչոցի էր նման, բայց ո՞վ էր, առավոտ կանուխ այս ամառի անտառում: Չայնն ավելի մոտիկից լավեց, հետո կարմրադեղին մի փեշ ընկավ աչքին՝ ծառի բնին փաթաթված: Չետո «Փեշը» քրքջաց ու թաքնվեց ծառերի հետևում: Արամը տեղից ցատկեց՝ ո՞վ է: «Փեշն» առաջ ընկավ, վազեց դեպի անտառի խորքը: Արամը ծայրեց՝ մի՛ գնա. արջ կա... Իսկ ծայրն ասես խաղում էր նրա հետ, մերթ կչկչում էր բարձր, մերթ երգեցիկ հեգում՝ Արա՛մ, Արա՛մ...

Ինքն էլ չհասկացավ՝ ինչպես խորացավ անտառի մեջ: Երբ բացատի հասավ, ծայրը լռել էր: Անտառային խոխոջուն մի առվակի մոտ կանգ առավ. ծարավ էր,

նայեց շուրջը, ոչ ոք չկար, կռացավ, բռով ջուր վերցրեց, հետո ուղղեց մեջքը՝ հայացքը նորից շուրջը պտտեցնելով:

Առավակի ակունքն աղբյուր էր, բլրից իջնում էր՝ մի քիչ այն կողմ բոլորելով փոքրիկ լճակ: Արևի շողերը ծառերի արանքից ընկել էին նրա մեջ ու ցուցում էին կապտադեղինություն: Մոտեցավ:

Լճակն այնքան սիրուն էր ու գողտրիկ՝ չկարողացավ անտառբեր անցնել: Չանկարծ ջրի վրա օղակներ նկատեց, հետո դրանք սահեցին հեռու, նորից հայտնվեցին, ջրի ճողպիտն լավեց, ու նրա մակերևույթին հայտնվեց մի կին, լույսի պես թափանցիկ ու մերկ, արևից ալիքով մազերի ոսկեգույն բոլորակը գլխի շուրջ պահած, և նույն ծայրը հասավ Արամի ակնաչին, հետո կինը սկսեց երգել բարակ, նուրբ: Արամին այս ամենը երազ թվաց, թվաց՝ ծանր խոհերից գլխի հետ ինչ-որ բան է պատահել: Գուցե տեսի՞լք է, կամ անտառի ոգի՞...»: Երբ ափին հասավ, կինն արդեն կանգնել էր նրա դեմ, մորեմերկ, առանց ամոթի, ուղիղ աչքերի մեջ նայելով.

-Չճանաչեցի՞ր,-չարածճի խնդաց նա՝ աչքերը կկոցելով:

Աչքերի այդ ծանոթ շարժումն էր, թե՛ մի այլ բան նրա հիշողության մեջ անցյալի ակնթարթներ վառեցին ու նորից հանգան...

-Շուշանն եմ, ձեր դասարանի,-ասաց ու Արամի ձեռքը դեպի սիրտը տարավ:

Անակնկալից Արամը կտրուկ հրեց նրան, զարմանքով ինչ-որ բառեր չշնչաց, բայց կինը համաճորդեմ նայում էր նրան, չէր ուզում զիջել: Չետո խելագար մի ճիշարձակեց ու նորից ջուրը մտավ:

Այդ տարօրինակ, օտարոտի ծայրը շատ բան ասաց: Չիշեց: Չարևանությամբ էին ապրում: Դպրոցը դեռ չավարտած՝ հայրը գոռով ամուսնացրեց: Մի տարի էլ չանցած՝ սկեսուրն ու տալը նրան ետ բերեցին.

-Խելքը թոցրել է, ձեր հիվանդ աղջկան տվիք, դժբախտացրիք խեղճ տղայիս,-հոխորտած մայրը,-հիվանդ էր, ձեր տանը պահեիք, ուրիշին ինչո՞ւ դարդի տեր դարձրիք...

Չետո նրան քաղաք տարան: Երկար ժամանակ բուժվում էր այնտեղ: Երբ տուր դարձավ, աչքերի կրակն արդեն մարել էր, ինքն էլ՝ ամեն ինչին անտարբեր: Արամը նրան վաղուց չէր տեսել:

Մտքերի գիրկն էր ընկել, երբ անակնկալ հասկացավ. ջրի վրա երկար ժամանակ էր՝ ո՛չ կինն էր հայտնվում, ո՛չ օղակներ: «Չխեղդվի՞» անցավ նրա մտքով: Մի փոքր էլ, ու նա արդեն ջրում էր: Լողաց, մինչև լճի վրա նորից օղակներ նկատեց: Ասես չար կատակ՝ կինը հայտնվում էր ջրի վրա, կարապի նման թեթև լողում ու նորից անհետանում ջրի տակ: Մինչ Արամը կհասներ, նա արդեն ափին էր՝ չարածճի ժպիտը դեմքին:

-Խելքը թոցրե՞լ ես, թե՞ գլուխդ ծարավել,-շարտեց բարկացած, երբ ափ էր հասել ու թաց հագուստներն էր քամում,-ուրիշ զբաղմունք չունե՞ս, ի՞նչ ես ընկել անտառները, բա դու վախ չունե՞ս:

Կինը մի պահ լրջացավ, հետո նրա խոշոր, շագանակագույն աչքերն էլ ավելի մթնեցին, նրանց չարածճի փայլի փոխարեն արցունքի երկու խոշոր կաթիլներ լողացին, լողացին ու անզուսպ ընկան նրա հուզմունքից բարձրացող կրծքին: Արամն անսպասելի խղճաց նրան, նրա դողացող մատները բռնելով՝ շշնջաց.

-Ների՛ր, ների՛ր ինձ, չէի ուզում... Ինձ բոլորն են խենթ համարում, դու մեղավոր չես, մեղավորն իմ բախտն է: Գիտե՞ս, ես քեզ շատ էի սիրում, իսկ դու միշտ հեգնում էիր, չգիտեիր...

Չետո ինձ ամուսնացրին: Ես ողջ գիշեր չքնեցի: Նստել էի ձեր բակում և հուսով էի, որ կհայտնվես: Բայց մայրս ինձ գտավ, գտավ ու նախատելով տուն տարավ:

Այդ մարդը՝ իմ ամուսինը, բայց ի՞նչ ամուսին. նա վախենում էր ինձ հետ քնել, իսկ ես ծածկում էի նրա հարազատներից, խղճում էի նրան: Մի օր էլ իրենք որոշեցին, որ ես արժանի չեմ իրենց տղային, հավաքեցին իրերս ու մեր տուն բերեցին: Իսկ ես հիմարաբար լռում էի...

Արամը նայում էր նրան ու մտածում՝ ինչպե՞ս չի նկատել, ախր նա աստվածային գեղեցկությամբ ունի: Մուգ շագանակագույն խառնիխիվ մազերը բոցկլտում էին արևի շողերից, կիսամերկ ուսերը փայլում էին սաղափի նման, բարակ իրանին թեթև գոտի էր ազուցված՝ աշխատանքի գույների պատառիկներով: Աշունն ասես իր գույներից կաթել էր նրա մազերին, հագուստին ու մարմնին: Դեղին փոքրիկ ծաղիկներով փեշի վրա կարմրադեղին հետքեր էին, ուսերն ու ձեռքերը ամռան արևներից թեթև շառագունած էին՝ բաց սաթի փայլով: Մինչդեռ հմայված նրան էր զննում, նա լռեց, հետո հանկարծ, ասես վտանգ զգացող եղնիկ, մի ոստյունով թռավ թփերի մեջ, չարածճի ժպիտ աչքերում՝ մարտահրավերի նման: Օդի մեջ նորից տարածվեցին նրա բույրն ու ծայրի ալիքները՝ Արա՛մ, Արա՛մ...

Արամն իրենից անկախ, ասես բնազդաբար, մտավ խաղի մեջ՝ վազելով նրա հետևից: Աղջկն անգիր գիտեր ծառ ու թուփ, այնպես էր ուսումնում, մազցում փոքրիկ բլուրներ: Արամը չէր կարողանում հասնել նրան: Իսկ հետո կորցրեց տեսողաշտից, թափառեց ձեռքը՝ մտածելով, որ չարած շարունակել: Քրտնել էր, և իջավ աղբյուրի մոտ՝ լվացվելու: Ի՛նչ տեսնի: Նորից կիսամերկ ծնկել էր աղբյուրին ու լվացվում էր անհագորեն: «Այս կինը ո՛չ վախ ունի, ո՛չ ցրտի զգացում: Տեսնե՞ս...», - ու իր սեփական մտքից շանթախար՝ վազեց նրա մոտ:

Շուշանը մի պահ ընկրկեց, հետո նստել էր քարին անբնագորսիկ ժպիտն աչքերի ցուլանքներում:

-Մի՛ ամաչիր, արի,-շշնջաց նա: Չետո սկսեց փեշի քուլերն արձակել: Արամը քար կտրած ո՛չ մոտենում էր, ո՛չ հեռանում: Մի սուր զգացում շամփրեց ողնաշարը, հետո գլուխն այրվեց տենդից բռնվածի նման: Նա ինքն էլ վախեցավ իրեն համակած ցանկությունից՝ քանի շաբաթ էր կնոջ հիվանդության պատճառով...

Չետո չհասկացավ, ինչպես մի տաք մարմին փաթաթվեց իրեն: Օձագալար եկավ, կպավ ոտքերին, ձեռքերը երկարել էր գլխից վերև ու գրկել տղամարդու իրանը: Կնոջ մոլեգին, կրակոտ շարժումներն Արամին զգեստեցին: Նա ասես թոցրեց կնոջը, պրկեց գետնից ու պառկեցրեց աշխատանքի խոնավ խոտերին: Նրանց մեջ ասես նախամարդու էներգիա էր այրվում, ասես Ադամից ու Եվայից այս կողմ կնոջ ու տղամարդու առաջին հանդիպումն էր: Օրվա ոսկեցույթը տերևների մեջ երկար լողաց, լողաց, հետո գնաց թաքնվեց թփուտների տակ՝ իր հետևից քարշ տալով թանձրացող մութի թանաքոտ վարագույրը: Անտա-

ռային ծայրերն արդեն մարում էին, նրանց կիսանիրիի մեջ մարդկային խուլ հառաչանքներ էին ու հնոց...

Տունդարձի ճամփան բռնել էին աղոթարանում լույսի առաջին վետվետումներից:

Արամը քայլում էր գլխահակ, նորից մտքերով ծանաթեռ: Փայտը, գիշերը մնալով անտառում, ավելի էր խոնավացել, առավոտվա շաղը դեռ վրան, սայլի մեջ խիտ-խիտ դարսված՝ օրորվում էր ավանակի անհամաչափ ու ծույլ քայլից: Արամը հեռանում էր անտառից, բայց նրան թվում էր, թե այնտեղ թողել է մի թանկ բան, որ կարող էր տարիների առաջ իրենը լինել: Արամից բավականաչափ հեռավորության վրա մի ստվեր էր հետևում նրան՝ երերուն ու վախկոտ: Ստվերը մերթ թաքնվում էր թփուտներում, մերթ անհամարձակ ճանապարհ ելնում: Արամի մտքերն այդ ստվերի հետ ամենահին էլ կապ չունեին, Արամի ցավը մի այլ, տարիներ առաջ չնկատված կնոջ շուրջ էր պտտվում: Իսկ ստվերն այն էր, ինչ մնացել էր այդ կնոջից՝ չբավարարված սիրո մնացորդներով ու հանկարծակիորեն բռնկված կրքով:

Երբ գյուղ մտավ, հեռվից նկատեց իրենց տան մոտ կանգնած տաքսին: Չետո վազելով եկավ ու նրան գրկեց երեխան՝ աչքերն արցունքով ողողված:

-Մամային տարել են, գիտե՞ս:

Արամը շտապեց բակ: Քույրը տնից դուրս եկավ կապոցներով ու մոտեցավ տաքսի մեքենային: Արամին նկատելով՝ հուզումնախառն ու արագ արտաբերեց.

-Սոմային արդեն վիրահատել են, լավ է, հիվանդանոց են գնում, դու էլ արի, քեզ կսպասենք, մինչև փոխվեն:

Արամը տուն մտավ: Միջանցքից թանապուրի ախորժաբույրն առավ, ստամոքսը կծկվեց: Մտավ խոհանոց, շերեփն առավ ու մի պնակ թանապուր լցրեց՝ էլ չէր դիմանում: Մի շնչով դատարկեց՝ անակն ու սենյակ մտավ փոխվելու: Մի տեսակ թեթևություն էր զգում, որ կնոջ վիրահատությունը հաջող էր անցել: Իսկ թժշկին վճարելու մասին ընդհանրապես մոռացել էր:

Ծանապարհին քրոջ խոսքերը նրա մտքերի թելերը ետ բերեցին: Չեռավոր մի ազգականից շտապ փող էին ճարել, երկու ամսից վերադարձնելու պայմանով:

Նոր տարին անցել էր: Սոման բավականին կազդուրվել էր, և զարուհը դեռ չեկած Արամն արդեն Ռուսաստան մեկնելու ծրագրեր էր մտնում: Մի օր էլ զանգահարեց հորեղբոր տղան և ասաց, որ անմիջապես մեկնի՝ գործ կա: Երկու օրում ամեն ինչ կարգավորեց, գնաց գոքանչին էլ բերեց իրենց տուն՝ կնոջն ու երեխային նայելու:

Գիշերը, երբ բակ էր դուրս եկել, մի ստվեր տեսավ: Թվաց մեկը՝ երկար փեշով, կանգնել է ծառերի արանքում ու մոտ չի գալիս: Արամն անտառի ծանոթ գլխապտույտն ունեցավ, մտավ այգի, բայց ծառերի արանքից խշխշալով մի բան փախավ: «Մա՞րդ էր, թե՞ կատու...» Սանցավ մտքովը: Այդ գիշեր վիրահատությունից հետո առաջին անգամ կնոջ հետ պառկեց. չէր կարելի: Սոման ամուսնու մեջ տարօրինակորեն արթնացած մի ուժ հայտնաբերեց: Ու մտածում էր՝ խեղճը կարող է:

Առավոտյան տաքսի մեքենան նրան օդանավակայան տարավ, իսկ նրանց բակում, խնձորենու տակ կանգնած, կիսամութի մեջ

ԵՂԵՐԱՆ ՓՈՊ

մի կին էր անխոս լալիս՝ ձեռքը կլորացող փորին:

Երբ գարուն եկավ, Արամի կինն արդեն լիովին կազդուրվել էր ու զարման ծփռեմակների պես վայելում էր ամուսնու ուղարկած փողերը, բայց հյուսիսից եկող:

Գարնան հետ ողջ գյուղը փսփսում էր Շուշանի կլորաքող փորից, նրա անտառներում թափառելուց և այն տղամարդուց, որն օգտվել էր նրա վիճակից: Բայց ոչ ոք չգիտեր, որ այդ ասեկոսեները հասցեատիրոջն ամենահին էլ չէր հետաքրքրում: Նա երջանկության դողով ամեն օր գրուցում էր իր մեջ հասունացող փոքրիկի հետ՝ սարում լինել, թե անտառում, կամ մահճակալի մեջ կծկված: Չայրն ու մայրը չէին համարձակվում նրան քաղաք անցնել, զրկել երեխայից: Վախենում էին այդ երևույթը ավելի խորացնի նրա հիվանդությունը: Այդպես, հոգսերի ու գործերի մեջ թաղված գյուղը գրեթե մոռացել էր նրա մասին, երբ մի օր լուրը տեստուն ընկավ. «Ախչի՛, իմացե՞լ ես՝ Շուշանն այս գիշեր աղջիկ է ունեցել»:

Շուշանի աղջիկը փաթթած, մոր նման գեղեցիկ մեծանում էր ամեն օր՝ հիացնելով բոլորին, իսկ Շուշանն ավելի կծկվել, մի բուռ էր դարձել: Նա արդեն գրեթե տուն էլ չէր մտնում, թափառում էր սար ու ձոր, երբ հարցնում էին, մի անուն էր մտնում ու նորից գնում էր անվան տիրոջը փնտրելու: Աշունը դեռ չեկած նրա վիճակն ավելի վատացավ, հիվանդությունը սրվել էր ծննդաբերությունից հետո: Արդեն փորձում էր վնասել մարդկանց: Ու մի օր էլ մի մեքենա կանգնեց նրանց դռան մոտ, երկու տղամարդ իջան, ձեռքերը կապկպեցին ու նրան տարան: Այդ օրից նա այլևս գյուղ չվերադարձավ:

Չմռանը, երբ Արամը վերադարձավ, այս խոսք ու գրույցը դեռ պտտվում էին գյուղի մեջ: Իսկ ամառորին, երբ բացեց հարևանների դուռը՝ շշմեց: Փոքրիկ սայլակին նստած էր մի հրաշք մանուկ: Նրա շագանակագույն չարածճի աչքերն ու ոսկեգույն մազերը մորն էին հիշեցնում, իսկ քիթ ու բերանն Արամը նմանեցրեց իր որդուն: Տատն ու պապը արդեն ծերացել էին, բայց լավ էին պահել իրենց թոռանը: Նրա այտերից վառ նռնագույնն էր կաթում: Արամը մոտեցավ, կանգնեց երեխայի մոտ, գրկեց, սիրեց, իսկ երբ հեռանում էր նրանց տնից, երեխան լացեց նրա հետևից:

Այդ օրվանից նա չէր մոռանում երեխային, առիթ էր փնտրում նրանց տուն կամ բակ գնալու: Իսկ երբ Շուշանի մայրը մահացավ, կնոջ ակամջին մի բան փսփսաց, որ հետո ամբողջ գյուղն իմացավ: Կինը չէր կարող չհամաձայնել, ինքն այլևս ի վիճակի չէր երեխա ունենալ, իսկ Արամը շատ էր սիրում այդ աղջկան: Շուշանի հայրը հեշտությամբ համաձայնեց: «Ես տապալվող ծառ եմ, շատ կուզենայի նրան տեսնել հուսալի ձեռքերում»՝ սա էր նրա պատասխանը:

Տղան կանգնել էր բակում՝ մոր փեշը բռնած, կնոջ ձեռքերում մի մեծ ծաղկեփունջ էր, երբ Արամն աղջկան գրկած եկավ: Չետո եկան գյուղացիները՝ աչքալուսաճրի: Բոլորը կարծում էին պարզապես որդեգրել է: Սակայն, տարիներ հետո այդ կծիկն էլ քանդվեց, աղջկն ասես հոր քթից թռած լինել՝ մոր անզուգական պատկերով:

Մարինե
ՍԿՐՏՅԱՆ

Հովհաննես Գրիգորյանի ստեղծագործություններում Գյուլնրին դիտարկվում է որպես գոյաբանական տարածք, մշակութային կոլորիտի և ազգային հիշողության կենտրոն:

Երբ Հովհաննես Գրիգորյանն իր պոեզիայով հայրենիքը տեղավորեց սրտում ու բառերում, դժվար թե պատկերացներ, որ տարիներ անց իր գրչի զարկերն ու սրտի թրթռումները կդառնան նաև նոր սերնդի գրադարանների ու սրտերի պարտադիր ու ոգեշնչող մասնիկը:

Վերջերս Գյուլնրու Ֆուրմանով փողոցում՝ բանաստեղծի մանկության բակում, նրա հիշատակը հավերժացնող հուշատախտակ բացվեց:

Ներկաները՝ գրականության ու մշակույթի մարդիկ, մերձավոր հարազատները, վստահ էին՝ այս քայլը խորհրդանշական է բանաստեղծի պոեզիան էլ ավելի տարածելու, հանրահռչակելու համար: Ելույթ ունեցողներն ընդգծեցին, որ նման քայլերը ոչ միայն հիշատակի նշան են, այլև շարունակական կապ անցյալի ու ներկայի միջև: Հովհաննես Գրիգորյանի խոսքը շարունակում է ոգեշնչել և ձևավորել այն սերնդին, որ դեռ որոնում է իր բառի ու գոյի ճշմարտությունը այս բոլորովին, բոլորովին ուրիշ աշխարհում:

ՀՐԵՏԱԿՆԵՐ ՄԱՆԿՈՒԹՅԱՆ ԵՐԿՆԵՐԻՑ

(Պոեմ՝ տարբեր տարիներին գրված բանաստեղծություններով)

ՀԻՆ ԳՈՐԳ

Եվ մատդ նորից նախշի վրայով սահում է կամաց – սկզբում աղոտ, հետո պարզորոշ ինչ-որ ծայներ են հասնում շատ հեռվից՝ վայրի աղմուկով գնում-գալիս էր պատուհանիդ տակ ավտոմեքենան, նախ մեկն էր, հետո դարձան մի քանի, հետո շատացան, և փողոցային շների կյանքը թևակոխեց նոր, հիրավի ծանր, դժվարին էտապ, որի նմանը չէր տեսել բնավ անցյալ օրերի ոչ մի անտեր շուն: Փողոցի շներ՝ մերկ ու անոթի, իմ ժամացույցներ փոշոտ մանկության, ձեր աղեկտուր կլանչոցն ահա հասավ ականջիս, ասել է՝ ժամը յոթն է, և տանից արդեն ելել է ժեշտանջի վաղոն, գործի է գնում, անտրամադիր քացահարելով ճամփին պատահած քնատ շներին, որոնք այնպես էին վարժվել արդեն սապոգին նրա՝ էլ չէին շարժվում պառկած տեղերից՝ պատերի տակից, ուր մանր դողով սեղմված իրար անցկացրել էին չարքաշ, անոթի և մի գիշեր: Հետո վայնասուն մի անտանելի՝ ժամը ութն եղավ, վարսավիրները անցան փողոցով, և խիստ գործնական, վարժ շարժումներով՝ փորձելով ձեր պոչ-ականջի վրա սրությունն իրենց մկրատ-ածելու: Եվ մատդ նորից նախշի վրայով սահում է կամաց – և շունչդ պահած սպասում ես լուռ՝ կողքի սենյակից ուր որ է մայրդ կկանգի հիմա –

վեր կաց, այ տղա, ուշ է, ժամը տասն եղավ, և ի հաստատումն մորդ խոսքերի՝ հայիոյանք, հաչոց խառնվեցին իրար՝ մսագործ Ավոն, բնույթով բարի, բայց տեսքը դաժան, բուրդի կողմից չսիրված, նաև շների կողմից, և կրկնվում էր նույն պատմությունը՝ ամեն առավոտ՝ ճիշտ ժամը տասին – մսի հոտ առած շներն հաչում էին, և հայիոյում էր Ավոն կատաղի, շներից քիչ-քիչ անցում անելով նախ կնոջն, ապա՝ զոքանջին, հետո հարևաններին, հետո՝ ընդհանուր, հետո մարում էին աղմուկ ու քայլեր, և մատդ նորից նախշի վրայով սահում է կամաց, ինչ-որ քաղաքի, ինչ-որ մի բակում հին գորգ է կախված, և մի ջահել կին, երեխան գրկին, բարի հայացքով մայում էր, լուռ, գուցե հասկացանք, որ տարիները գնում են արագ, և տարիքն առած օտարականն այս, ի՞նչ իմանաս, թե ինչեր է հիշել այս հին գորգի դեմ, որ խոնավացան աչքերը, նույնիսկ արցունք հայտնվեց՝ նախ մեկը, հետո դարձան մի քանի, հետո շատացան...

ԵՐԵՒԱՆ, ՈՐ ԱՐԹՆԱՅԵԼ ՈՒ ԼԱԽՍ ԷՐ

Մարմանդ անձրև էր մաղում Բոշի թաղում, և օրը երեքշաբթի էր: Գորշ մութուլուսի միջով գալիս ու տեղ չէր հասնում Յոթվերքի դողանջը հեռավոր, գալիս էր ու խառնվում արթնացած երեխայի լացին, դարպասների ճռնչոցին ու հագին տղամարդկանց, որ ծանր քայլերով ելնում էին տներից ու հանդիսավոր, դանդաղ մարում անձրևի մեջ միալար: Իսկ երեխան լալիս էր, ու անձրևը չէր կտրվում: Բոշի թաղում երեքշաբթի էր՝ անթիվ, անժամանակ, անհույս: Մի պառավ պիտի մեռներ՝ ծոռներով, թոռներով շրջապատված, և իր գործն իմացող տան շունը վայում էր բարեխղճորեն, վայում էր առանց հաճույքի՝ հալից ընկել էր արդեն... Շաբաթից ավելի էր՝ պառավը մեռնում էր ու չէր մեռնում, և շունը վայում էր ու անձրևը չէր կտրվում:

Իսկ երեխան լալիս էր, ու պառավը չէր մեռնում – իր մեծ որդուն էր սպասում, որին հեռագիր էին տվել հեռավոր մի քաղաք, մի քանի օրվա ճանապարհով, որտեղ հիմա ծյուն է գալիս և գորշ մութուլուսի միջով գնում-տեղ չի հասնում Յոթվերքի դողանջը մեռավոր, լացը երեխայի, դարպասների ճռնչոցն ու հազը տղամարդկանց... ...Եվ օրերը, որ անձրևի նման մաղում են միալար, անվերջ շարանը երեքշաբթիների, և կյանքը, որ անցնում է գորշ մութուլուսի միջով,

և ծերունին, որ անցնում է ծանր հազալով, ծերունին – երեխան, հիշո՞ւմ ես, որ արթնացել ու լալիս էր Բոշի թաղում, երբ օրը երեքշաբթի էր և մարմանդ անձրև էր մաղում...

ԻՍԿ ԵՐԲ ԶՅՈՒՆ ԵԿԱՎ

Իմաստուն խոսելու կարոտը քեզ խոցեց անվերադարձ, և դու քայլեցիր կռացած: Գավառական փոքրիկ քաղաքը քեզ ոչինչ չսովորեցրեց, նա իր թարմ կաթն էր մատուցում ճշտապահորեն՝ առավոտյան և երեկոյան: Իսկ երբ ծյուն եկավ, դու բուրդովին սենտիմենտալ դարձար: Դեռ մանկուց թեքում կար քո մեջ անբացատրելի տխրությունների, թախծի սահուն ելևեջների և անկյունային գոյության հրաշքների նկատմամբ: Իսկ երբ ծյուն եկավ, դու ուզեցիր հիշել անցյալդ՝ գոնե մի ծխախոտի համար, գոնե մի քիչ երազելու համար, այդ ամենը դու ուզեցիր՝ հենց երբ ծյուն եկավ: Գավառական փոքրիկ քաղաքը ծաղկազարդ սոնետի է նման, իզուր բաների համար այնտեղ երկար չեն ծափահարում, այլ ժպտում ենք թի տակ և թատրոն են գնում հսկայական ընտանիքներով: Եվ գրավաճառը հին շյապան գլխին ուղիղ դրած հրավիրում է քեզ խոսելու դեսից-դենից: Իսկ դու լուռ սեղմում ես նրա ձեռքը, կորած հիացմունքով համեմատում իջնող ծյունը կաթի հետ և հրաշքով փրկվելով դրավաճառի կենսութախությունից, նետվում ես փողոց և քայլում ծաղկազարդ սոնետի տողերի երկայնքով:

ՇՐՋԱՆԱԿ ԼՈՒՍԱՆԿԱՐԻ ՀԱՄԱՐ

Փայտյա հասարակ շրջանակի մեջ պարզ երևում է հայացքդ մարած, գլուխդ թեքած աջ ուսիդ վրա, ցանցառ մորուքդ արդեն ճերմակող, մագաղաթագույն դեմքդ անվա: Խելառ Սարգի՛սը, Խելառ Սարգի՛սը – և ոտաբորիկ երեխաների բազմությունն ահա ճիչ ու աղմուկով վազեց փողոցով – սակայն տխուր է հայացքդ մարած, ոչ ոք չգիտե՝ երրորդ գիշերն է, որ դու չես քնում, երրորդ գիշերն է սատկել է կատուդ՝ ընկերդ միակ, և գաղտագողի թաղել են նրան քաղաքային մեծ այգու անկյունում, երրորդ գիշերն է, որ դու ջրում ես գերեզմանն առատ, փխրեցնում հողը, մաքրում քարերից, մոլախոտերից, և կողքին նստած սպասում ես լուռ, թե արդյոք երբ է դուրս գալու ծիլը քո կատվածառի... Հուսով մայում էիր երկնքին խավար և կրկնում էին շուրթերդ ակամա՝ եթե գարունը անձրևոտ լինի, եթե ամառը լինի արևոտ, եթե աշունը բարեսիրտ լինի, եթե ծննանը առատ ծյուն տեղա...



Խելառ Սարգի՛սը, Խելառ Սարգի՛սը – և ոտաբորիկ երեխաների բազմությունն ահա սուրաց փողոցով... և գիշերն իջավ երկու ձեռքերով հենվեց տաք հողին... Իսկ դու չես հոգնել, թեև հայացքդ մարած է լրիվ, նստել ես ինչ-որ դարպասի կողքի, լուսավոր թեքած աջ ուսիդ վրա – ու հանկարծ տեսար՝ ինչ-որ տեղ մութը ավելի էր մութ, և այդ մութի մեջ երկու կանաչ կետ, լուսավոր կանաչ, մերթ մոտենում էին ու մերթ հեռանում, և քո մարմինը ձգվեց, վեր ելավ և սրտապատառ վազում էիր արդեն քաղաքային մեծ այգու ուղղությամբ և հենց դռան մոտ քեզ դիմավորեց Կապույտ Դանուբի ալիքն առաջին, և թաքնվելով մթնում խտացած ստվերների մեջ, առաջ գնացիր – թիերի միջից երևում էին պարզ վալսի ներդաշնակ տակտով զբոսնող քայլեր՝ զույգերի՝ ի՞նչ հրաշալի տեսարան էր դա, այրեր պատվարժան – և գինյորական նվագախմբի գործիքների պես պապղում էին մաքուր սափրված այտերը նրանց, իսկ ճարմանդները, կոճակներն հապա... Եվ տիկնայք փարթամ, լիքը կրծքերով, աղամանդների, ոսկյա, արծաթյա զոտիների ու մատանիների, ժանյակ-շղթայի, ապարանջանի, ականջօղների սահուն-շարժական ճոխ ցուցահանդես՝ ի՞նչ հրաշալի տեսարան էր դա. անցնում էին հպարտ տատեր-պապերի, աղջիկ-հարսների և փեսաների իրար սեղմված շարքերն համերաշխ, բոլորը խմբով, բոլորն ուս-ուսի, միայն դու մենակ, ցանցառ մորուքով, գլուխդ թեքած աջ ուսիդ վրա, մարած հայացքով թիերի միջից մայում էիր նրանց, և ձեռքդ ակամա թաց գերեզմանն էր շոյում քո միակ, մեռած ընկերոջ, և կրկնում էին շուրթերդ ակամա. եթե գարունը անձրևոտ լինի, եթե ամառը լինի արևոտ, եթե աշունը բարեսիրտ լինի, եթե ծննանը առատ ծյուն տեղա...

քաղաքում, ուր ոչ ոք քեզ չի հիշում, ուր ոչ ոք չի մայում քեզ, բայց ասում են առանց մայելու – տխուր է, և ավելի է տխուր, երբ շրջում ես հայացքդ և զորքնդ – զրնգ դողանջում են քաղաքի բոլոր եկեղեցիները, և պատերի տակ մորթվող ճերմակ աղավնիների հայացքում արմաքան է լինում առաջին սերդ, որը թաքնվում է ստվերների մեջ, փափուկ փետուրները քսելով սև ու հարթ պատերի կույր ու սգավոր աչքերին... Իսկ նրանք չեն մայում քեզ, բայց ասում են առանց մայելու – իզուր է, բայց ավելի է իզուր, երբ շրջում ես հայացքդ և գլխիվայր նետվում տարիների ջրիորի մեջ, և լացն ու հեկեկոցը ծանր հոգոցի պես պոկվում են մարմնիցդ, և կնճիռներն են պոկվում մարմնիցդ, և մանկությունդ լցվում է աչքերիցդ ներս և սեղմում է սիրտդ... սեղմում է սիրտդ... Եվ խեղդվողի պես զարմանքից ու հիացմունքից բացում ես բերանդ ճշալու համար, որովհետև տեսնում ես նրան... նրան... խորքում, ամենահեռվում, ամենավերջում, ստվերների մեջ՝ ճերմակ աղավնին – սերը առաջին, որը մեկիկ-մեկիկ պոկում է իր փափուկ փետուրները, մեկիկ-մեկիկ բացում է իր արմածոր վերքերը, և խեղդվողի պես ցավից ու կսկիծից բացում ես բերանդ ճշալու համար և... զորքնդ-զրնգ դողանջում են քաղաքի բոլոր եկեղեցիները...

ՍՊՈԹԵ

Չորս քայլ վեր... սահման է: Չորս քայլ վար... սահման: Աստված իմ, այսքան էլ փոքրիկ հայրենիք, այսքան էլ փոքրիկ Հայաստան, նորածնի բարուր է իսկական... Նորածնի բարուրը գրկել եմ, Աստված իմ, մոլորվել, կանգնել եմ. ասա ինձ, ի՞նչ անեմ, ո՞ւր գնամ- Չորս քայլ վեր՝ ավեր է ու մահ է, Չորս քայլ վար՝ ավար ու թալան...

ՍՈՍՑԻՆ ՍԵՐԸ

Առաջին սերը, որը թաքնվում է ստվերների մեջ,

Հովհաննես ԳՐԻԳՈՐՅԱՆ

ԱՐԵՎՄՏԱՀԱՅԵՐԵՆ ԲԱՆԱՍՏԵՂԾՈՒԹՅՈՒՆ



ՍԻԻՋԱՆ ԽԱՐՏԱԼԵԱՆ


ՅՈՈՒՆԵՍԿՈ ԶԵՆԱՑՆԵԼԷ

յոզմեր են ձեռագնել, որ ընթրիքի պատուոյ հիւրը ես եմ երբ գիտեմ որ ամեն անգամ ընթրիքը ես եմ ամեն անգամ ընթրիքը ես եմ

հեռախօսիս վրայէն ջնջեցի բոլոր անմիտ խաղերը ընկերային ցանցերը բռնաբարութեան խուցին մօտէն բարձրացող աղբի գարշահոտը

սկիզբը ձեռքս ակամայ կերթար գարշահոտին թմրամոլի պահանջքը հոն է ուրուական ցաւի մման չկայ թելդ բայց կայ թելիդ վառ յիշողութիւնը

կուրծքէն կտրուիլը անսպասելի արագ էր ու ես մոռցայ կաթի համը հիւթալի հիմա կը մտածեմ երթալ քայլ մը անդին ձեռքիս անցնել հի՛ն ժամացոյցը աստիճան մը եւս կտրուիլ ընթրիքներէն սեռերէն դառնալ բարեյոյս մարդ



ՅԱՐՈՒԹԻՒՆ ՊԵՐՊԵ-ՐԵԱՆ

ԱՇՆԱՆԱՅԻՆ ՍԻՐԵՐԳ

Այդքան կանուխ լերկացած անտառներու թէ փողոցի թխկենիի ծառերուն մէջ, աշմանային տերեւաթափի համատարած ցանցին ինկած, կարգ մը ծառեր, տակաւին շքեղօրէն կը պահեն իրենց ոսկին եւ կարմիրը բոցեղէն՝

ինչպէս որ դուն, սիրելիս, ինչպէս որ դուն, սիրելիս:

ԱՐԱՋԵՏԵՆ ԱՂՏՈՐԻ

Ամառ կը յուշէ, թարխուն ու ծոթրին, հազար բնական այլ ջերմ բոյրեր, այս ծնեմնային եղանակին մէջ՝ իր վառ շողերով մեզ գինովցուցած օրը արեւոտ:

Կարծես կրկին կը քալենք արահետէն աղտորի. եւ սումմախի կարմրաւուն ծաղիկները, որոնք գիտեն իրենց ծոցին այնքան բուրմունք, այնքան համեր ամբարել՝ կ'արթնցնեն զգացումներ անթելուած:

Սէրս, աչքերդ կը կայծկտան վերստին, եւ գլուխդ հանդարտ կը հանգչի, իմ կուրծքիս վրայ:



ՔԱՐԵՆ ԲԱՐՍԵՂԵԱՆ

ՍԻՐԵԼԻ ԱՍՏՈՒԱԾԱՍՕՐ

Մայիս ամիսն ամբողջութեամբ Նուիրուած է Տիրամօր ոգեկոչման հորհրդանիշն է մօր քաղցրութեան: Մեր սիրելի Աստուածամայր, Ամենահօգօր անարատ տիրամայր Դուռն ես ամենայն առաքինի երանելի ու պատկառելի Գերահրաշ ու ամենաշնորհալի Իգական սեռն այս աշխարհի: Աստուծոյ ընտրեալ համեստ կոյսը Շնորհունակ՝ Քրիստոսի մայր կոչումը, Խաղաղ, հանդարտ ու սիրուն երկնային մեր մայրն ես զուարթուն: Գարնան ցայտուն աղբիւրը եղեմական անթառամ ծաղիկը Յաւերժ կը զարդարես տիեզերքը: Անդորր կապոյտ երկինք ու ջինջ ջրեր Աստուածածնի փիրուզեայ աչքեր, Աստուածավախ նայուածքդ դողդոջուն Վսեմաշուք կեցուածքդ քաջազուն, Գեհեմային որոգայթներն սանձարծակ Մայրական քո պաշտպանութիւնն ընդարձակ Գիշեր ցերեկ կ'աղօթենք Շնորհքիդ ապաւինելով քեզ

կը հայցենք Ու հաշտութեան միջնորդ կը սեպենք, Մեր եւ Աստուծոյ միջեւ Յիսուսի անունի ներքեւ Մեր մեղքերու թողութիւնն կը խնդրենք Խաղաղ ու սիրով կեանք կը մաղթենք: Բարեխօսէ մեզ համար Աստուծոյ քով Կ'աղերսենք քեզ անսահման վստահելով:



ՍԱՐԻԱՆԱ ՊԵՐԹԻՋԼԵԱՆ ՂԱԶԱՐԵԱՆ

ՉԱՅՆ ՏՈՒՐ, ԾԱՌ

ԿՐԿԻՆ ԹՈՒՐՔԵՐԸ Կ'ԱՆՑՆԻՆ

Հարաւէն Հիւսիս, կ'ուղղուիմ գլխիկոր... Սուրիական ծովեզերքն է. Կը խօսիմ տրտմած լեռներուն, պատասխան չունին Կը խօսիմ հարբած ծովուն պատասխան չունին... Կը ծայրեն գետերուն. կարմիրը կը ճչայ Ձայն կու տամ երկնքի բաց կապոյտին Կը լսուի մեղմիկ մեղեդի. - Եթէ նոյնիսկ հրեշտակներու լեզուով խօսիս եւ սէր չունենաս, ոչինչ ես,- կ'ըսէ. Ու ճամբայ կ'ելլեմ ես սէր ունենալու. - Նոր երկինք է - ցոյց կու տայ հրեշտակս մատով, եւ նոր լուսին. - Բացուիր երկինք նորոգէ, բժշկէ՛, սիրովդ առատ: Կորսուած հրեշտակներու երկիրը պատասխան չունէր ինձի Ոչ իսկ մեղեդիի խազ մը Իսկ իմ հրեշտակս օրհնութիւն մըմնջելով Ձիս կը տանի թւերուն վրայ Ցոյց տալով սիրատոշոր տա-րածքներ Ու ես շնորհապարտ եմ Թափանցիկ այգին համար Ուր միասին կը ճախրենք Կ'անձրեւենք Սուրիոյ ափերուն Որոգելով տանջուած երկիրը նոր սիրով... Մայրիներու երկրէն Աստուածամերձ որոգայթներ Մինչեւ Բերիա հնամենի Ականուած փակուղիներ... Արեւմուտքէն արեւելք ու հիւսիս Կը շրջիմ Թւերուն վրայ անոր Մեծացուցանելով անունը Սիրով... Ականներու փոխարէն Գեղեցկութեան ուրախութեան

իւղ հայցելով... Մեսմերկ տերեւաթափ ձիթենիի ծառեր Մէկ առ մէկ կը տողանցեն մեր առջեւէն Աւերակ շէներուն ընդմէջէն Որոնց արունները ինքնակոչ նուիրեալներն են Նոր գարնան մը խաբուսիկ: Սուրիոյ ցաւակէզ երակներէն անցնելով Արեւմտահայաստանի բաց վերջին հոտը կու գար Կրկին թուրքերը կ'անցնէին այդ վայրերով... Մի՛ յապաղիր, հրեշտակս, դուն օրհնել եւ յոյսի լապտերդ վառել:



ՎԻԳԵՆ ՅՈՎԱՏՓԵԱՆ

ԿԱՏԱՐԵԱԼԸ ԵՒ ԴՈՒՆ

Կուզեմ որ դուն հասկնաս, թէ կատարեալին ես արժանի, իսկ կատարեալը սրտերու մէջ կը ծնի, մտքերու մէջ է կը ծաղկի, երազանքին կիշխէ ու անոր կը տիրանայ:

Կուզեմ որ դուն հասկնաս, թէ դէպի կատարեալը ուղեւորութեանդ մէջ կարելորդ չէ թէ ո՞վ ես դուն այսօր, կարելորդ այն է թէ ով պիտի ըլլաս վաղը եւ յաջորդ օր, մինչ ամեն կողմ խիղճեր կը մեռնին, ամեն օր, ամեն ժամ մարդիկ կանմարդանան:

Կուզեմ որ դուն հասկնաս, թէ ինչպէս որ աչուկներդ կը փակես այս գիշեր, այդպէս ալ պէտք է փակես դռները մատողաշ սրտիդ, խաւարին առջեւ եւ ատելութեան, պէտք է սորվիս ատել՝ նոյնինքն ատելութիւնը, վերադառնալ զայն խեղդելու անգամներ եւ անգամներ, իսկ ատելու կարողութիւնդ՝ առաւել անգամներ, մինչ մարդիկ որոնք անցեալին մէջ օր մը սիրած եմ, որոնք հիմա թոյն կը շնչեն, որոնք ատելութիւն կը թքեն, դազադի իրենց ճամբուն վրայ քայլ առ քայլ կը խեղճանան, աւելի կատեն, աւելի կանմարդանան, եւ կամաց-կամաց կը փոշիանան:

Կուզեմ որ դուն լաւ հասկնաս

այն, ինչ որ ես շատ ուշ հասկցայ, թէ քաջն ու խիզախը փամփուշտէ կամ անձօքէ չէ որ կը խոցուին, այլ հոգիի խաւարէն կը մեռնին, խաւարէն, ուր ոչինչ կայ ազնիւ կամ ասպետական, հոն ուր կանհետանան հերոսութիւններն անգամ, հոն ուր կոյր է ամեն բան, իսկ դուն երբ վաղը առաւօտ արթննաս, ու կապոյտ աչքերդ լայն բանաս, պայծառն է որ պէտք է ըմբոշխնես, որպէսզի ընդունիս բարին եւ բարին միայն, պէտք է նոյնացնես մէջդ բարին եւ ազնուականը, ազնուականն ու մարդկայինը, մարդկայինն ու խիզախը, պէտք է խիզախ ազնութեամբ ծաղկիս, պէտք է շունչ տաս մէջիդ ծաղկումին, ու հոն ծուարած բարիին հասնելու համար կատարեալին:

Կուզեմ, շատ կուզեմ որ դուն այս հասկնաս:



ԼԵՈՆԱ ԳԱՐԱԳԻԹԻՔ

ԱՆՈՒՐՋ ՍԸ

Անվերջանալի ցաւերու տուայտանքին շիջած երակներուն մէջ լոյս մը կը հոսի կրնաս լսել անձկութիւնն որ սարերուն վրայ խրոխտ ժամանակի ընդմէջէն կը բորբոքի բառեր կը դիզուին քովէ քով ըղծանքներ կան անհասանելի սակայն դուրս չեն թափիր ներքինը կ'այրի ով պիտի գիտնայ ուր է թաքուն սէրը որ միայն պիտի այրէին շրթները անխօսելի ծայնապնակը պիտի երգէ ծիծաղկոտ քրքիջներով սին երազներ պիտի չկրկնուին հեղ մը անցեալը սրբել կարելի կը դառնայ հեռանալ ոչ միայն մտքով սիրտ մը անհետադարձ սկնարկներու իր խորշերը կը փակէ առանձնութիւնը կը ժայթքի հրաբուխի մը բերնին մէջ կ'այրէ բոլորտիքը եւ կ'ոչնչանայ մարմինը

Էջը կազմեց Նունե ՆԻԿՈՂՈՍՅԱՆԸ

Հրատարակված է ՀՀ ԿԳՄՍ նախարարության աջակցությամբ:

Լրատվական գործունեությունն իրականացնող՝
Հայաստանի գրողների միության Շիրակի մարզային
մասնաճյուղ:
Հասցեն՝ Շիրակի մարզ, Գյումրի, Գորկու 62
Վկայական N 01Բ 001543

տրված է 21.03.2005թ.
հեռ. (094) 53 44 64
խմբագրական խորհուրդ
Գլխավոր խմբագիր՝
Ռոզա Հովհաննիսյան

Համակարգչային ձևավորումը՝ «Էլեկտրոնային Պրինտ» ՍՊԸ
Տպագրված է «Վան Արյան» հրատարակչատան
տպարանում
Տպաքանակը՝ 500
Ծավալը՝ 2 տպագրական մասով